

四庫全書

史部

欽定四庫全書

史部

御批續資治通鑑綱目卷十四

詳校官修撰臣錢榮

編修臣程嘉謨覆勘

總校官候補中允臣王燕緒

校對官主事臣王學海

謄錄監生臣蔣濬

欽定四庫全書

御批續資治通鑑綱目卷十四

起戊午宋高宗紹興八年盡
乙丑宋高宗紹興十五年

凡八年

戊午年 金天眷
春正月張守罷

帝議還臨安張守言建康自六朝為帝王都氣象雄
偉且據都會以經理中原依險阻以捍禦疆敵陛下
席未及暖今又巡幸百司六軍有勤動之苦民力邦
用有煩費之憂願少安於此以繫中原人心趙鼎不
可守遂求去
出知婺州

廣義 異哉趙鼎之見也向嘗建策以為越不可都
當都荆襄高宗既無意於荆襄則建康不猶

愈於臨安乎昔人有言寧飲建鄴水不食武昌魚寧還建鄴死不到武昌居鼎於是時贊成張守之言不亦美乎今乃曰不可則鼎之聰明不及於前矣宜乎屢見斥於其君也

二月胡安國進春秋傳詔加安國寶文閣直學士

自王安石廢春秋不列於學官安國謂先聖手所筆削之書天下事物無不備於此乃傳心之要典也而人主不得聞講說學士不得相傳習亂倫滅理罔知顧忌殆由乎此因潛心二十餘年著春秋傳以成其志至是上之帝謂深得聖人之旨詔進一官命未下而卒賜謚文定安國強學力行以聖人為標的志於康濟斯民見中原淪沒遺黎塗炭常若痛切於身雖數以罪去受君憂國遠而彌篤風度凝遠視天下萬物無一足嬰其心自渡江以來儒者進退合義以安國尹焞為稱首謝良佐嘗語人曰胡康侯如大冬嚴

雪百草萎死而松柏
挺然獨秀者也

發明

春秋孔子之刑書示百王之大法寓褒貶之

氏有傳泛而不切穀梁有傳直而不精皆未足以

發明之也

安國潛心二十餘年作為本傳其間微

顯闡幽提綱挈目誠有益於治天下國家之良規

也所謂尊君父

討亂賊闢邪說正人心用夏變夷

大法畧具庶幾聖王經世之志小有補云之意耳

雖然安國春秋

之傳蓋為高宗而作也使其讀此

能知大義渙起復讐之志恢宏攘敵之心詎可北

面而事金哉

惜其蔽固已深終莫能悟也綱目書

此蓋深
美之

廣義

康侯之傳春秋實吾夫子之家相也王安石

之叛經

是得罪於聖門者也得罪於聖門乃

欽定四庫全書

御批歷代通鑑輯覽
卷十四

得罪於天下後世者也康侯相吾夫子是有功於聖門有功於天下後世者也由是觀之則其人之賢不肖何如耶噫康侯之道雖不得行於當時然後世學者讀其書則可以想見其人之綱正道行於萬世也豈博當時之一官哉

帝定都臨安

帝自建康至臨安自是始定都矣一日內侍移竹栽入內趙鼎見之責曰良嶽花石之擾皆出汝曹今欲蹈前轍耶因奏其事帝改容謝之又有一戶部官進錢入宮者鼎召至相府切責之翌日問帝曰其人獻錢耶帝曰朕求之也鼎曰其人不當獻陛下不當求遂黜其人於遠郡

發明

嗚呼高宗至是誠無意於中原矣苟有志於中原者不都川陝則都荆襄不都建康則都

維揚今而定都杭州僻處海角則栖栖然苟安之意見矣蓋起於西北然後可以控制東南起於東南則非可以恢復西北況臨安僻在一隅初非用武之地諸葛武侯曰漢賊不兩立王業不偏安高宗寧忍棄祖宗之地也忘父母之仇讐而偷安於一時也耶直書定都不再貶而其義自見

三月以劉大中參知政事王庶為樞密副使○以秦檜為尚書右僕射同平章事兼樞密使

初張浚嘗與趙鼎論人才浚極稱檜善鼎曰此人得志吾輩無所措足矣及鼎再相檜在樞密一惟鼎言是從鼎由是深信之言檜可大任於帝而不知為檜所賣也檜既相制下朝士相賀獨吏部侍郎晏敦復有憂色曰姦人相矣問者皆以其言為過

發明

臣嘗感世道盛衰之由觀小人進退之機竊於宋朝增慨焉自建隆一陽之萌駁駁而至

於慶歷六陽之盛天下皆君子而小人不見也自熙寧一陰之生紛紛而至於宣靖六陰之極君子委蛇退縮波流風靡而小人荆棘多矣當熙寧之初王介甫方進也新參彈文呂誨力排辨姦一篇老泉深詆李定新入也缺求當制而不肯草詞李蘇舍人相繼封還當時諸賢凜凜於堅冰之至也切矣秦檜再入張浚極稱其善趙鼎深信其賢能知姦人入相而獨有憂色者惟晏敦復一人而已嗚呼浚鼎因檜謹默即以為能殊不知為檜所賣也語曰論篤是與君子者乎色莊者乎自檜再相浸不能制嗣是以後正人盡斥而和議決成中國之屈辱益甚矣故特書以謹其始云

廣義

大抵君子用心也坦小人用心也險坦已易見險則難知故雖張浚趙鼎之聰明先見亦

為賊檜所賣況高宗乎易曰戎伏於莽三歲不興其賊檜之謂乎

陳與義罷

初朝廷議與金和趙鼎言人多謂中原有可圖之勢宜便進兵恐他時咎今日之失機與義曰若和議成豈不賢於用兵帝然之至是以疾出知湖州

夏四月詔王庶視師江淮

庶素有威望臨發勞師於都教場便服坐壇上自大將以下悉戎服步由轅門庭趨受命拜賜而出莫敢仰視至淮上遂移張俊下張宗顏軍淮西巨師古屯太平州分韓世忠二軍屯天長泗州緩急為聲援以劉錡軍駐鎮江以固根本

欽定四庫全書

卷十四

五月王倫偕金使來

倫至會寧見金主首謝廢劉豫次致使指會達蘭自河南還言于金主請以廢齊舊地與宋金主命群臣議烏布力言不可東京留守額爾袞曰我以地與宋宋必德我阿蘭折之曰我俘宋人父兄怨非一日若復資以土地是助讐也何德之有勿與便富勒呼位在烏布上達蘭額爾袞附之由是富勒呼執議以河南陝西地與宋遣倫及其太原少尹烏凌阿思謀太常少卿石慶來議事將至帝命吏部侍郎魏珏館伴之珏以為御史時嘗言和議之非不可奉詔因備論敵情之不可信秦檜曰公以智料敵檜以誠待敵珏曰第恐敵不以誠待相公耳檜乃改命吳表臣思謀等至臨安入見帝謂輔臣曰先帝梓宮果有還期雖待二三年尚庶幾惟是太后春秋高朕旦夕思念欲早相見此所以不憚屈己冀和議之速成也朝臣多言

其不可帝怒趙鼎曰陛下於金人有不共戴天之讐
令屈已請和不憚為之者以梓宮及母后耳群臣憤
邁之辭出於愛君不可以為罪陛下宜諭之曰講和
非吾意以親故不得已為之但得母后及梓宮還敵
雖渝盟吾無憾帝
從其言眾議遂息

發明

直書僭來不予其自來也前書韓肖胄僭金
使來此書王倫僭金使來則是和出於宋而

非出於金明矣忘敵大讐反求和議自書契初成
以來所未嘗有也為國如此尚可望其自強哉吁

廣義

觀分注趙鼎告高宗之言是亦持兩
端之說耳安得不滋賊檜之姦志乎

金以經義詞賦兩科取士○六月賜衍聖公孔玠衢州

田

欽定四庫全書

卷十四

凡五頃以奉先聖祠
事時玠僑於衛也

秋七月彗星見

發明

祥桑生庭足以兆商家之禍白魚入舟足以

無救於哀亂者其本不立故也彗星示變天之告
戒切矣其如君德不振何忍恥偷安國事廢輟天

亦莫如之何也已書
之亦所以哀之也

○王倫復如金

秦檜復請遣倫如金足和議及申問諱日左右言辛
次庸以國恥未雪義難講好凡七上疏力諫不報乃

以母疾求補
外詔從之

八月金始頒行官制

初金太祖用漢官賞左企弓等因置中書省樞密院於廣寧而其國用事者未改女真官號舍音烏布當國勸用漢官制度畧倣中國之制立省寺府司太宗嘗下詔改定而未畢至是置三師三公三省六曹臺院寺監等官宇文虛中為之參定其制

金以會寧為上京臨潢府為北京

會寧即海古勒地金之舊土也安春水源出於此故名金源初稱為內地至是升為上京會寧府改遼上京臨潢府為北京而東京遼陽西京大同南京大興中京大定府則仍舊云

冬十月罷參知政事劉大中

大中與趙鼎不主和議秦檜忌之薦蕭振為侍御振入臺即劾大中罷之鼎曰振意不在大中也振亦謂人曰趙丞相不待論當自為去就矣

發明

望之為政先漢君子方幸以為福而望之不戒懼反為小人所乘陳蕃得志後漢君子

方恃以為依而陳蕃不謹持防反為小人所陷甚矣小人讐隙善類也君子持正小人持邪而小人以為君子之異已君子執是小人執非而君子以為小人之異心大中不主和議見忌秦檜而蕭振鄙夫附會劾之即被罷黜豈不深可惜哉檜振邪媚小人固無足責高宗進退人才畧無可否是亦寄生之君焉耳故綱目直書罷而不去其官所以明其無罪之可罷也

鄺延故將李世輔誘執金薩里罕來歸金人追及之乃

奔夏

世輔綏德青澗人自唐以來世襲燕尾九族都巡檢使世輔年十七隨父永奇出入行陣金人犯鄜延經畧王庶募問者世輔往應募有敵人夜宿陶穴世輔絕陶穴中得十七人皆殺之取首二級馬二匹餘馬悉折其足庶大奇之補充隊將由是知名遷副將金人陷延安授永奇父子官永奇聚泣曰我家臣也世襲國恩乃為彼用邪會劉豫令世輔帥馬軍赴東京永奇密戒之曰汝若得乘機即歸本朝無以我故貳其志事成我亦不朽矣世輔至東京劉麟喜之授南路鈐轄乃密遣其客雷燦以蠟書赴行在及豫廢烏珠以萬騎馳獵淮上與世輔獨立馬圍場問世輔戒吳俊往探淮水可渡馬處欲執烏珠歸朝俊還世輔馳問之為竹刺傷馬而止烏珠授世輔知同州世輔至鄜省父永奇教世輔曰同州入南山乃金人往來

驛路汝可於此擒其帥渡洛渭由商號歸朝第報我知我當以兵取延安而歸世輔赴同州即遣黃士成等持書由蜀至吳報歸朝事金薩里罕來同州世輔以計執之馳出城至洛河舟船後期不得渡與追騎屢戰皆捷世輔總高原望追騎益多薩里罕博頰求哀世輔乃與折箭為誓不得殺同州人及害我骨肉薩里罕許之遂推之下山崖追兵爭救得免世輔攜老幼長驅而北至郿城縣急遣人告永奇永奇即聚家出城至馬翅谷為金人所及家屬三百口皆遇害世輔僅以二十六人奔夏

發明

觀李氏父子之所為蓋亦破家殉國忠於朝廷者使其謀得遂則亦庶洩累年之積憤矣

故綱目特書故將書來歸皆所以予其向義也

趙鼎罷

初中書舍人滿良貴以戶部侍郎向子諲奏事久叱
之退帝欲抵良貴罪中丞常同為之辨帝欲併逐同
鼎奏子諲雖無罪而同與良貴不宜逐帝不從命下
給事中張致遠為不應以一子諲出二佳士不書黃
帝怒顧鼎曰固知致遠必繳駁鼎問何也帝曰與諸
人善蓋已有先入之言由是不樂鼎秦檜繼留身奏
事及出鼎問帝何言檜曰上無他恐丞相不樂耳會
殿中侍御史張戒論給事中勾濤濤言戒擊臣乃趙
鼎意因詆鼎結臺諫及諸將帝問益疑鼎乃引疾求
罷且言劉大中持正論為章惇蔡京之黨所嫉臣議
論出處與大中同大中去臣何可獨留出知紹興府
入辭言於帝曰臣去後必有以孝悌之說脇制陛下
者將行檜率執政餞之鼎不為禮一揖而去檜益憾
之鼎自再相無所施為或以為言鼎曰今日之事如
人患羸當靜以養之若復攻砭必損元氣矣後王庶
入對帝曰趙鼎兩為相於國有大功再贊親征皆能

決勝又鎮撫建康回
鑒無虞他人所不及

廣義

趙鼎之罷賊檜之謀也觀其留身奏事而不
知其所言者何事但曰恐丞相不樂耳不樂

之言豈非示罷鼎之意哉雖然此亦高宗與檜志
同道合故檜得售其姦耳不然檜豈得相而鼎宜
得去哉及觀分注載鼎辭高宗之言曰臣去後必
有以孝悌之說制陛下者其意欲破和議也昔者
鼎嘗教高宗諭群臣曰講和非吾意以親故不得
已為之但得母后及梓宮還敵雖渝盟吾無憾斯
言也足以予盾今日陛辭之言也噫一人之言而
前後所異如此宜乎以藉奸賊之口而墮其計也

以勾龍如淵為御史中丞

先是宰執入見秦檜獨留身言臣僚畏首尾多持兩
端此不足以論大事若陛下決欲講和乞專與臣議

勿許群臣預帝曰朕獨委卿檜曰臣恐不便望陛下更思三日檜復留身奏事帝意欲和甚堅檜猶以為未也復進前說又三日檜復留身奏事如初帝意不移乃始出文字乞決和議然猶以群臣為患中書舍人勾龍如淵為檜謀曰相公為天下大計而邪說橫起盍不擇人為臺諫使盡擊去則事定矣檜大喜即推如淵為中丞劾異議者卒成其志

廣義

嗚呼人徒知賊檜之姦而不知賊檜之奸乃高宗有以成之也使高宗不欲講和賊檜安

能售其奸哉惟彼講和一事乃高宗怯懦之素志故檜得以遂其奸耳且檜雖不堅其意高宗亦將惟檜是從況堅之至於再至於三耶若絕以春秋之法當置高宗於首惡云

金以張通古為江南詔諭使來言歸河南陝西之地

王倫至金金主以其右司侍郎張道古簽書宣徽院事蕭哲為江南詔諭使許歸河南陝西地與倫偕來通古至泗州要所過州迎以臣禮知平江府向子誼不肯拜且上言和議之非遂乞致仕通古至臨安要帝待以客禮泰檜未見國書疑為封冊欲帝屈已以受之帝曰朕嗣守太祖太宗基業豈可受金人封冊於是朝論藉藉揚沂中解潛韓世良相率見檜曰軍民洵洵若之何退又白之臺諫中丞勾龍如淵詣都堂與檜議召倫責之曰公為使通兩國好凡事當於彼中反覆論定安有同使至而後議者倫泣曰倫涉萬死一生往來虎口者數四今日中丞乃責倫如此檜等共解之曰中丞無他亦欲激公了此事耳倫曰此則不敢不勉如淵謂檜曰但取金書納之禁中則禮不行而事定給事中樓昭亦舉諒陰三年事以告檜遂以檜攝冢宰諸館受書而倫亦以計說通古通古從之檜至館見通古受其書通古欲百官備禮檜

使省吏朝服導從以書納於禁中人情始安通古入
見言先歸河南陝西地徐議餘事先是倫使金從趙
鼎受使指鼎言問禮數則答以君臣之分已定問地
界則答以大河為界二事使者之大指或不從則已
倫受命而行至是倫還有詔諭江南之名帝歎息謂
王庶曰使五日前得此報趙鼎豈可去耶初檜主和
議命韓世忠移屯鎮江世忠言金人說詐恐以計緩
我師乞留此軍蔽遮江淮因力論和議之非願效死
節率先迎敵若不勝從之未晚章數上皆慷慨激切
且請單騎詣闕面奏帝不許及張通古來以詔諭為
名世忠四上疏言不可從願舉兵決戰兵勢最重處
臣請當之且言金人欲以劉豫相待舉國士大夫盡
為陪臣恐人心離散士氣凋沮不報及通古還世
忠伏兵洪澤鎮將邀殺之以懷和議不克而罷

發明

不著國號而曰江南不曰通問而曰招諭不
曰來聘而曰來言歸者我求於彼之詞綱目

所最謹者統系之辨書法如此畧無隱諱者罪宋也高宗忘父母之大誓信姦臣之欺已排斥正士銳意和戎而以詔諭為名則是金為君而宋為臣金為正統而宋為實國冠履為之倒置矣嗚呼縱復河南陝西之地而得不償失屈辱益甚矧來言而未來歸者乎宋人廉恥道喪國不成國君不成君臣不成臣而三綱於是掃地矣雖得天下其可以一朝居哉

廣義

嗚呼趙宋之懼金難無乃手足倒懸之極夫且以為使一事言之自徽欽之在金軍也在

金國也曰二聖通問使者二曰祈請使者一曰軍前通問使者三曰金國通問使者三曰奉迎梓宮使者一使凡十往使名甚卑其尊金主何如也今也金方遣使則置其名曰江南詔諭使曰詔諭者臣民之也金何尊而宋何卑耶噫人謂高宗之中興其亦過論也歟

十一月以孫近參知政事○罷直學士院曾開詔群臣
議和金得失貶樞密院編修官胡銓監廣州都鹽倉

禮部侍郎兼直學士院曾開當草國書辨視體制非
是論之不聽遂請罷改兼侍讀秦檜以溫言慰之曰
主上虛執政以待開曰儒者所爭在義苟為非義高
爵厚祿弗顧也願聞所以事敵之禮檜曰若高麗之
於本朝耳開曰主上以盛德登大位公當強兵富國
尊主庇民奈何自卑辱至此非開所聞也復引古誼
折之檜大怒曰侍郎知故事檜獨不知也開又詣都
堂問計果安出檜曰聖意已定尚何言公自取大名
而去如檜但欲濟國事耳然猶慮群言乃詔金國遣
使入境欲朕屈已受和在朝侍從臺諫其詳思條奏
和好得失於是開與從官張洵晏敦復魏矼李彌遜
尹焞梁汝嘉樓炤蘇符薛徽言御史方庭實館職胡

理朱松張擴凌景夏常明范如圭馮時中許忻趙雍
皆極言不可和提舉洞霄宮李綱亦上疏言朝廷使
王倫使金國奉迎梓宮往返屢矣今倫之歸與金使
偕乃以詔諭江南為名不著國號而曰江南不云通
問而曰詔諭此何禮也臣在遠方不知其曲折然以
愚意料之金為此名以遣使其要求有五必降詔書
欲陛下屈體降禮以聽受一也必有赦文欲朝廷宣
布頒示郡縣二也必立約束欲陛下奉藩稱臣稟其
號令三也必求我賂廣其數目使我自困四也必求
割地以江南為界五也此五者朝廷從其一則大事
去矣金人變詐不測貪惓無厭縱使聽其詔令奉藩
稱臣其志猶未已必繼有號召或使親迎梓宮或使
單騎入覲或使移易宰相或使改革政事或竭取賦
稅或腹削土宇從之則無有紀極一不從則前功盡
廢反為兵端以為權時之宜聽其邀求可無後悔者
非愚則誣也疏入不省胡銓抗疏言曰臣謹按王倫

本一狎邪小人市井無賴頌緣宰臣無識舉以使金
專務詐誕欺罔天聽驟得美官天下之人切齒唾罵
今者無故誘致金使以詔諭江南為名是欲臣妾我
也是欲劉豫我也陛下奈何以祖宗之天下為金人
之天下以祖宗之位為金藩臣之位陛下下一屈膝則
祖宗廟社之靈辱於異姓祖宗數百年之赤子委之
敵國朝廷宰執盡為陪臣天下士大夫皆當聞風喪
氣無復廉恥異時敵人無厭之求安知不加以無
禮如劉豫也哉今倫之議曰我一屈膝則梓宮可還
太后可復淵聖可歸中原可得嗚呼自變故以來主
和議者誰不以此說陷陛下哉然而卒無驗則敵之
情偽已可知矣而陛下尚不覺悟竭民膏血而不恤
忘國大讐而不報含垢忍恥舉天下而臣之甘心焉
就令金決可和盡如倫議天下後世謂陛下何如主
况敵情變詐百出而倫又以奸邪濟之梓宮決不可
還太后決不可復淵聖決不可歸中原決不可得而

此膝一屈不可復伸國勢陵夷不可復振可為痛哭
流涕長太息矣臣竊謂不斬王倫國之存亡未可知
也雖然倫不足道也秦檜以腹心大臣而亦為之陛
下有竟舜之資檜不能致君如唐虞而欲導陛下如
石晉徐近傳會檜議遂得參政伴食中書漫不敢可
否事檜曰可和近亦曰可和檜曰天子當拜近亦曰
當拜嗚呼參贊大事徒取充位如此有如敵騎長驅
尚可折衝禦侮耶臣竊謂檜近亦可斬也臣備負樞
屬義不與檜等共戴天區區之心願斷三人頭竿之
藁街然後羈留余使責以無禮徐興問罪之師則三
軍之士不戰而氣自倍不然臣有赴東海而死寧能
取小朝廷求活耶書上檜以銓狂妄忤鼓衆叔持
詔除名編管昭州仍降詔播中外給舍臺諫及朝臣
多救之檜迫於公論翌日改銓監廣州都鹽倉宜興
進士吳師古殺其書於本金人募之千金朝士陳剛
中以啓事賀銓之謫師古坐流袁州剛中謫知虔州

安遠縣皆死焉。是敦復謂人曰：頃言檜姦諸君，不以爲然。今方專國，便敢爾。他日何所不至耶？

發明

豫章羅氏曰：人君納諫之本，先於虛己。禹拜

問當革國書，辨聞非是，論之不從，遂爲罷黜。乃所
爭以義也。宋金世，讐理難和好，奚必議之？既云詔
議當察是非，而忘胡銓之直諫，則知議之者姑塞
一時之正論，殊無意於議之也。高宗忘戴天之讐，
親變詐之敵，謂之得計，可乎？孟子曰：於不可已而
已之，無所不已。於所厚者薄，無所不薄也。高宗復
讐之義，乃不可已者，而乃已之，父母之恩不可薄
者，而乃薄之，豈不爲萬世之罪人哉？齊景公既不
能令，又不受命，涕出而女，於吳高宗既不能自強，
其國令反受金之命，誠景公之不若矣。綱目書此，
辭繁而不殺，則
美惡之情可見。

廣義

嗚呼李胡二公之疏真可謂忠誠貫金石節義凜冰霜者也有臣如此而不能行其言之

一二則知高宗以中興自期者乃虛文也

王庶罷

庶論金不可和上疏者七見帝言者六秦檜方挾金自重以為功絀其說庶語檜曰公不思東都抗節存趙時而忘此敵耶檜大恨庶因乞免簽書和議文字且累疏求去遂罷為資政殿學士知潭州

十二月以李光參知政事

秦檜既定和議將揭榜以吏部尚書李光有人望欲藉以同押榜以息浮議乃請於帝而用之光既受命遂於尚書省榜諭金國使來盡歸河南陝西故地通好於我許還梓宮及母兄親族餘無需索

書法

假令敵意盡如賊檜所言其不共戴天之讐決不可不復況未必如其所言哉

以韓肖胄簽書樞密院事

起九年

金天眷二年

春正月大赦

以金國通和大赦江南新復州軍直學士院樓炤草
款文畧曰乃上穹開悔禍之期而大金報許和之約
割河南之境土歸我興國戢宇內之干戈用全民命
張浚在永州上疏言燕雲之舉其鑑不遠金自宣和
以來挾詐反覆傾我國家蓋非可結以恩信者借令
敵中有故上下紛難天屬盡歸河南遂復我必德其
厚賜謹守信誓數年之後人情益解士氣沮消彼或
內變既平指瑕造孽肆無厭之欲發難從之請其將
何辭以對顧事理可憂又有甚於此者陛下積意兵
政將士漸享一旦北面而事金聽其號令小大將帥莫

不解體蓋自堯舜以來人主奄有天下非兵無以立國未聞委贄可以削平禍難者也前後凡五上疏皆不報兵飛在鄂州聞金將歸河南地上言金人不可信和好不可恃相臣謀國不戒恐貽後世譏秦檜街之及赦至岳飛又上疏力陳和議之非至有願定謀於金勝期收地於兩河唾手燕雲終欲復讐而報國誓心天地尚令稽首以稱藩之語疏入檜益怒遂成讐隙和議成例加爵賞飛加開府儀同三司力辭言今日之事可危而不可安可憂而不可賀可訓兵飭士謹避不虞而不可論功行賞取笑敵人三詔不受帝溫言獎譽之飛乃受命吳璘在熙州其幕客擬為賀表璘慨然曰在朝廷休兵息民誠天下慶璘等四竊不能宣國威靈亦可愧矣但當待罪稱謝可也

書法

大抵天下之事圖之於未形者易為力圖之於已形者難為功見於未形者智者能之而

愚者不及也見於已形者衆人皆能之惡在其為
智者哉張浚之遇高宗可謂得君之甚者也觀其
建功立業凡百所為炳炳可觀不謂之智可乎然
其薦秦檜則智者之所不為也浚也何獨明於此
而暗於彼哉且當高宗欲再用檜之時浚當曰陛
下免檜而榜其罪於朝堂示不復用豈惟在朝之
臣知之天下之所共知也況陛下親嘗詰檜曰朕
北人將安歸乎推及此言寒心切骨且當亢龍有
悔之時信義為急若再用檜是失信義於天下也
信義一失則所為刑罰不中刑罰不中則民無所
措手足如此則在廷之臣勤王之師誰不解體孰
與陛下為理以雪父兄之大讐大恥哉浚若言此
則高宗曩時亦未嘗受檜蠱惑之深其不再用檜
也必矣今於高宗將欲用檜反引薦之及乎檜勢
薰灼然後知悔上疏極諫果何益哉周公戒成王
曰始醵醵厥攸灼叙弗其絕此之謂乎使浚能防

於饒饒之初則其勢必不至於不可撲滅也嗚呼
張浚徒致難為之功不識易為之力尚何智者之

可名
哉

二月遣判大宗正事士褒兵部侍郎張燾詣河南修奉

陵寢

初史館校勘范如圭以書責秦檜力諫和議忘讐辱
國之罪且曰公不喪心病狂奈何為此必遺臭萬世
矣及金人歸河南地檜方自以為功如圭入對言兩
京之版圖既入則九廟八陵瞻望咫尺今朝陵之使
未遣何以慰神靈萃民志乎帝泣然曰非卿不聞此
言即日遣士褒等往檜以如圭不先白已益怒如圭
遂謁
告去

發明

甚矣高宗之無耻也值父母之喪正哀毀之際書云高宗諒陰三年不言今而匿怨講和

忘哀肆赦寧不取譏於敵國貽笑於天下乎河南未復志得意滿先遣宗臣修奉陵寢嗚呼祖宗陵寢隔絕既久高宗不能自強恢復而乃屈已要盟雖云修奉則祖宗在天之靈亦不帖泰矣未幾金復內侵河南隨陷高宗之求和者果可恃哉故備書以貶之

以尹焞提舉萬壽觀兼侍講辭不拜

先是竇善堂朔善朱震疾亟薦焞自代帝慘然曰楊時物故胡安國與震又亡朕痛惜之趙鼎曰尹焞問學淵源可以繼震乃除焞太常少卿兼崇政殿說書至是改命焞以和議為非固辭不拜

書法

且夫任所以行其道也和議一成則和靖之道不可行矣道既不行則雖祿之以天下弗

顧也況一官乎綱目大書辭不拜者所以表和靖之清風高節也荷輿休哉

以王倫為東京留守

命倫交割地界又以周奉為陝西宣諭使方庭實為三京宣諭使庭實至西京先朝陵寢自永昌而下皆遇發掘而秦陵至暴露庭實解衣覆之歸以白帝秦檜怒之尋以路允迪為南京留守孟庾兼東京留守李利用權留守西京

以吳玠為四川宣撫使

玠與金人對壘且十年常苦遠餉勞民屢汰冗員節浮費蓋治屯田和議之成帝以玠功高授開府儀同三司四川宣撫使陝西階成等州皆聽節制遣內侍奉手札以賜至則玠病甚扶掖聽命

三月王倫至汴金人歸河南陝西之地

王倫至汴見烏珠交割地界得東西南三京壽春府宿毫曹單州及陝西京西諸州之地烏珠遂自祁州

渡河而去移行

臺於大名府

發明

金人前此嘗書來歸武朔州矣又嘗書來歸燕及檀薊州矣此獨書歸何也書來歸者金

人心服而歸之也曰歸者宋請而得之也中國天子請於敵人而得故土豈不深可恥乎然而上書王倫至汴而下書金人歸地則其求之之意尤深切而著明者噫高宗誠不可與論復讐之事矣其與春秋書齊人歸我濟西田同意君子宜並觀之

書法

時諸將恢復氣銳金人不敢渝盟故也

以棲炤簽書樞密院事夏四月命炤宣諭陝西

炤至鳳翔承制以楊政為熙河經畧使吳璘為秦鳳經畧使屯內地以保蜀郭浩為廊延經畧使屯延安以守陝炤倚秦檜勢妄自尊大且好貨失將士心

罷權吏部尚書晏敦復

和議之初敦復力詆屈巳之非秦檜使人誅之曰公若曲從兩地旦夕可至敦復曰吾終不以身計而誤國家况吾蘆桂之性到老愈辣請勿復言檜卒不能屈權吏部甫踰月罷知衢州

發明

敦復不附秦檜力詆和議之非觀其對檜之語可謂富貴不能淫威武不能屈者已君子

持己以義而不以利吾於敦復見之矣罷非其罪故書罷而不去其官其義自見

五月李世輔自夏來歸賜名顯忠

世輔至夏夏人問其故世輔泣其言父母妻子之亡切齒疾首恨不即死願得二十萬人生擒薩里罕取陝西五路歸於夏世輔亦得報不共戴天之讐夏主曰爾能立功則不靳借兵時有酋豪號青面夜叉者父為夏國患乃令世輔圖之世輔以三千騎晝夜疾馳奄至其帳擒之乃還夏主大悅即出二十萬騎以文臣王樞武臣伊克為陝西招撫使世輔為延安招撫使世輔至延安總官趙維清大呼曰鄜延安復歸朝已有赦書世輔取赦文觀之因與官屬列拜大哭乃以舊部八百餘騎往見王樞伊克諭之曰世輔已得長安府見講和赦書招撫可以本部軍歸國伊克不從曰初經畧乞兵來取陝西今既到此乃令我歸耶世輔至勢不可乃出刀斫伊克不及擒王樞縛之夏人以鐵鷄子軍來世輔以所部拒之馳捕雙刀所

向披靡夏兵大潰殺死蹂踐無慮萬人獲馬四萬匹
世輔揭榜招兵每得一人予馬一匹旬日間得號勇
少壯者萬人乃擒害其父母弟姪者斬於東市行至
鄆州有馬步軍四萬餘吳玠遣張鎮撫諭之曰兩國
現議和好不可生事世輔遂見玠於河池玠遣詣樓
照于長安照承詔以為護國軍承宣使樞密行府前
軍都統制送之朝世輔乃率部下
三千南來帝撫勞再三賜名顯忠

發明

書來歸者世輔心服而歸之也李氏鄴延故
將始終心宋前書誘金薩里罕來歸不果而

奔夏此書自夏來歸皆所以深予其向
義之心也見君子之心樂與人為善矣

書法

曰忠曰智曰勇此人之所難也
若世輔者可謂克盡其道者歟

夏主乾順卒子仁孝立

仁孝改元大慶
號乾順曰崇宗

開府儀同三司四川宣撫使吳玠卒

玠善讀史凡往事可師者錄置座右積久牆牖皆格言也用兵本孫吳務遠畧不求近小利故能保必勝御下廉而有恩虛心請受雖身為大將卒伍最下者得以情達故士樂為之死選用將佐視勞能為高下先後不以親故權貴抗之卒年四十七贈少師謚武安自富平之敗金人專意圖蜀徽玠身當其衝無蜀久矣故西人思之立祠以祀

發明

綱目於人臣之卒書爵不書爵前因已論之矣吳玠忘身循國百戰禦金屹然為兩川之

保障忠君憂國死而不渝自中興以來若玠者誠可謂之賢將也卒而書爵豈過予乎

廣義

南渡諸將世稱張韓劉岳臣惟或於劉光世焉當云韓岳吳張則庶乎有得綱目之旨

士儂張燾還自河南出燾知成都府

士儂至鄂岳飛請以輕騎從洒掃實欲觀釁以伐謀秦檜白止之士儂出蔡潁河南百姓歡迎夾道以喜以泣曰久隔王化不圖今日復為宋民遂入柏城披歷榛莽隨宜葺治禮畢而還詔封士儂為齊安郡王張燾奏疏曰金人之禍上及山陵雖懾服之未足以雪此恥復此讐也必不可恃和盟而忘復讐之大事帝問諸陵寢何如燾不對唯言萬世不可忘此恥帝默然秦檜患之出燾知成都府

廣義

觀燾所奏之言所謂直氣吐而星斗寒也高宗寧不為之動心哉其不亡者特幸焉耳

秋七月以胡世將為四川宣撫副使

世將精神明快聞習吏治初除宣撫諸將皆賀世將語之曰世將不習騎射不知敵情朝廷所以遣來者襲國家故事以文臣為制將耳軍事一無改吳宣撫之規各推誠心共濟國事可也諸將皆拜謝

金宋王富勒呼等謀反伏誅

金富勒呼自以太宗長子跋扈尤甚克王額爾袞為左丞相復附之達蘭方持兵柄遂相與謀反事覺富勒呼額爾袞皆伏誅達蘭屬尊釋不問

王倫如金金人執之

烏珠言於金主曰達蘭富勒呼主割河南與宋必有陰謀今宋使在汴勿令踰境倫聞之即遣介具言於朝會孟庾至汴倫即解留輪將使指赴金國議事行至中山會達蘭等反金人執之倫見金主於御子林

致使指金主不答而令翰林待制耶律紹文為宣慰官問倫知達蘭罪否倫對不知又問無一言及歲帶反求割地汝但知有元帥豈知有上國耶倫曰比蕭哲以國書許歸梓宮太母及河南地天下皆知上國尋海上之盟與民休息使人奉使通好兩國耳紹文復曰卿留雲中已無還期及貸之還曾無以報反問或我君臣耶乃遣副使藍公佐還議歲貢正朔誓命等事及索河東北士民之在南者而徙倫拘於河間以待報命之至時皇后耶氏崩於五國城金人秘之

廣義

仰觀歸地者烏珠也敗盟者亦烏珠也
嗚呼敗盟者金之常事耳高宗何忍焉

金以達蘭杜充為行臺左右丞相八月達蘭以謀反誅

丞相命下達蘭謂使者曰我聞國功臣也何罪而使
我降與杜充為伍耶遂復與翼王呼蘭等謀反事覺

且疑達蘭與宋陰結故主割地遂命誅之
達蘭南走追而殺之於祁州其黨皆死

發明

富勒呼達蘭一為金之宗室一為金之大將
相繼叛逆皆受典刑則奸宄難操之情狀可

見矣然綱目必書謀反必書伏誅者蓋亂臣賊子
法所必討苟以仇敵之故而遂昧討賊之公則人
欲肆而天理滅亂臣賊子將接迹於天
下矣烏足謂之誅亂討逆之權衡哉

知邵州王彥卒

彥當建炎初屢敗大敵威聲振河朔號稱名將時方
撓於和議遽召之還又奪其兵柄而使之治郡士議
之惜

冬十二月李光罷

光初謂可因和為自治之計故署樛不辭及秦檜議撤淮南守備奪諸將兵權光始極言金人所求無厭和不可恃備不可撤檜惡之光復折檜於帝前曰觀檜之意是欲壅蔽陛下耳目盜弄國權懷姦悞國不可不察檜大怒光遂求去

廣義

張浚之薦秦檜而後排之李光之署和樛而後非之是二人者正猶延盜入室而戒其取

貨也悔何及哉

蒙古襲敗金人於海嶺

金呼沙呼攻蒙古糧盡而還蒙古追襲之大敗其衆於海嶺

發明

此志蒙古將興之漸也金以全盛之時尚為蒙古所敗則其強弱之機已可見矣故特謹

而書之所以志
余亡國之本

庚申十年金天春正月遣工部侍郎莫將等使金

初將謂司農丞與監察御史施廷臣附秦檜抗章力
贊和議檜拒用將為起居郎廷臣為侍御史朝論大
駭尚書晏敦復等上疏切諫於是二人皆不受命檜
患之至是以將為工部侍郎充迎護梓宮奉迎兩宮
使

觀文殿大學士隴西公李綱卒

綱卒於福州年五十八贈少師諡忠定綱負天下之
望以一身用舍為社稷生民安危雖身或不用用且
不久而其忠誠義氣凜然動乎遠邇每使者至金金
人必問李綱趙鼎安否其為遠人所畏服如此宋熹

曰綱之為人知有君父而不知有身知天下之有安危而不知其身之有禍難雖以讒間寵斥屢瀕九死而其愛君憂國之志終有不可奪者可謂一世之偉人矣史臣曰以綱之賢使得畢力殫慮於靖康建炎間莫或撓之二帝何至於北行而宋豈至為南渡之偏安哉

發明

李綱忠義出於天性至其謀猷贊襄卓冠當代宋道繼續編書提舉臨安府洞霄宮李綱

卒而不書其爵陳氏綱目書提舉洞霄宮而不書其官史法固無義例也至綱目備載其官爵大書於冊以見予之之意君子固當比例考之然後知書法損益自有權度不可以其近而忽之也

廣義

分注云金人必問李綱趙鼎安否蓋言其齊等故也臣謂趙鼎大純而小疵李綱純乎純

者也勸鼎變夫定都之議與夫不能察檜之奸蓋可見矣

夏四月韓肖胄罷○五月金烏珠薩里罕分道入寇復陷河南陝西州郡

烏珠以歸河南陝西地為非計而張通古又言宋置戍河南請及其步置未定當議收復烏布然之及達蘭誅遂大開國中兵於祁州命烏珠自繁陽趨河南右監軍薩里罕出河中趨陝西分道入寇烏珠率孔彥舟等入汴遣烏祿取常德李成取河南分兵下諸郡於是東京留守孟庾南京留守路允迪皆以城降權西京留守李利用棄城走河南州縣皆降拱州守臣王懷毫州提轄魏經死之薩里罕入同州趨永興軍權知軍事郝遠聞門納之陝西州縣所至迎降遂追據鳳翔初闕陝新復朝廷分軍屯熙秦鄜延諸路薩里罕既至鳳翔陝右諸軍皆隔在金後遠近震恐秦檜以其言不售甚懼謂給事中馮檉曰余人背盟

欽定四庫全書

卷十四

我之去就未可卜前此大臣皆不足慮獨君鄉袁未測上意君其為我探之械入見曰金人長驅犯順勢必興師如張浚者且須以戎機付之帝正色曰寧至覆國不用此人檜聞之喜

發明

中國不可以示弱仇敵不可以結信高宗或於秦檜屈已和戎以為一隅可樂萬世無虞

思削將權思撤邊備夫何訂盟未幾金復背約所得故地尋又失之然則和議抑奚足恃乎譬猶割肉補瘡瘡不可復肉亦旋盡雖欲不亡得乎高宗力排衆議銳成和好殊不知為金所賣耳苟以誠心歸宋何必與而復取哉厥後諸將克捷少振華風而賊臣秦檜猶主和議檜固不足責高宗若是亦可謂忘親釋怨者矣綱目因金人入寇特書於冊者既譏宋人之不自強又見金人之不可信也

廣義

金人渝盟入寇而高宗誓不復用張浚者賊檜之慶也

詔吳璘同節制陝西諸軍六月璘敗金人於扶風復其
城薩里罕走鳳翔

初胡世將在河池倉卒召諸將議時吳璘孫渥已在
楊政田晟繼至諸將請少退清野以挫其鋒渥言河
池不可守璘厲聲折之曰懦語沮軍可斬也璘請以
百口保破敵世將壯之指所居帳曰世將誓死於此
遂遣諸帥分據渭南尋詔世將詣屯蜀口以璘同節
制陝西諸路軍馬時金人犯石壁砦璘遣姚仲等破
走之既而薩里罕使鶻眼郎君以三千騎衝璘軍璘
使統制李師顏以驍騎擊敗之敵先於扶風築城既
敗入城拒守官軍攻拔其城獲三將及女真百十七
人薩里罕怒甚自戰百通坊仲力戰破之薩里罕還
鳳翔由是金人不敢度隴
分屯之軍得全師而還

東京副留守劉錡大敗金人於順昌烏珠走汴

初錡赴東京率所部王彥八字軍三萬七千及殿司卒三千自臨安泝江絕淮至渦口方食忽暴風拔生帳錡曰此惡兆也主暴兵即下令兼程而進聞金人敗盟南下錡與將佐捨舟陸行先趨三百里至順昌城中謀報東京已降知府陳規見錡問計錡曰城中有糧則能與居共守規曰有米數萬斛錡曰可矣乃與規議欲兵入城為守禦計時八字軍以將駐於汴皆揚孥以行至是錡召諸將問計諸將皆曰金兵不可敵也請以精銳遮老稚順流還江南錡曰吾本赴官留司今東京為金所陷幸吾全軍至此有城可守奈何棄之吾意決矣敢言去者斬惟部將許清奮曰太尉奉命副守汴京軍士扶携老幼而來不如相與努力一戰於死中求生也議與錡合錡喜乃鑿舟沉之示無去意置家寺中積薪於門戒守者曰脫有不

利即焚吾家母辱敵手也分命諸將守諸門明斥候募士人為問探於是軍士皆奮男子備守戰婦人礮刀劍爭呼躍曰平日人欺我八字軍今日我當與國家破敵立功時守備一無可恃錡於城上躬自督勵取劉豫時所造廢車以輪轆埋城上又撤民戶扉周匝蔽之城外有民居數千家悉焚之凡六日粗畢而金兵已涉潁河遂圍城錡預於城下設伏擒敵將阿里等二人詰之云韓將軍營白沙窩距城三十里錡夜遣千餘人擊之連戰殺敵破衆既而金三路都統葛王烏祿以兵三萬與龍虎大王合而薄城錡令開諸門金人疑而不敢近初錡傳城築羊馬垣穴垣為門至是與許清輩蔽垣為陣金人縱矢皆自垣端射著於城或止中垣上錡用破敵弓翼以神臂強弩自城上或垣門射敵無不中者敵稍却復以步兵邀擊溺河死者不可勝計破其鐵騎數千時順昌圍已四日金兵益盛乃移砦於李村錡遣間充募壯士五百

夜斫其營是夕天欲雨電光四起見辮髮者輒殲之
金兵退十五里鈞復募百人往或請街杖鈞笑曰無以
杖也命折竹為器如市井兒以為戲者人持一為號
直犯金營電所燭則奮擊電止則匿不動敵衆大亂
百人者聞吹吶聲即聚金人蓋不能測終夜自戰積
屍盈野退軍老婆灣烏珠在汴間之即索靴上馬帥
十萬衆來援鈞會諸將開計或言今已屢捷宜乘此
勢具舟全軍而歸規曰朝廷養兵十五年正為緩急
之用況已挫敵鋒軍聲稍振雖寡衆不敵然有進無
退鈞曰府公文人猶誓死守况汝曹耶且敵營甚通
而烏珠又來吾軍一動彼據其後則前功俱廢使敵
侵軼兩淮震驚江浙則平生報國之志反成誤國之
罪衆皆感動思奮曰惟太尉命鈞募得曹成等二人
諭之曰遣汝作間事捷重賞第如我言敵必不殺汝
今置汝緋路騎中汝遇敵則佯墜馬為敵所得敵帥
問我如何人則曰太平邊帥子喜聲技朝廷以兩國

講和使守東京國逸樂耳已而二人果遇敵被執烏
珠問之對如前烏珠喜曰此城易破耳即置奪車砲
具不用而械成等還錡烏珠至城下責諸將喪師衆
皆曰南朝用兵非昔之比元帥臨城自見錡遣敗訓
約戰烏珠怒曰劉錡何敢與我戰以吾力破汝城直
用靴尖趣倒耳訓曰太尉非但請戰且謂太子必不
敢濟河願獻浮橋五所濟而大戰烏珠曰諾乃下令
明日府治會食遲明錡果為五浮橋於潁河上置毒
潁上流及草中戒軍士雖渴死毋飲於河飲者夷其
族敵用長勝軍嚴陣以待諸將各居一部時大暑敵
遠來疲弊晝夜不解甲人馬饑渴食水草者輒病往
往用乏錡士氣聞暇軍皆番休方晨氣清涼按兵不
動逮未中時敵力疲氣索忽遣數百人出西門接戰
能遣數千人出南門戒令勿喊但以銳斧犯之統制
官趙搏韓直身中數矢戰不肯已士殊死鬪入其陣刀
斧亂下敵大敗是夕大雨平地水深尺餘明日烏珠

拔營去錡遣兵追之死者數萬方大戰時烏珠被白
袍乘甲馬以牙兵三千督戰兵皆重鎧甲號鐵浮圖
戴鐵兜鍪周匝綴長簷三人為伍貫以韋索每進一
步即用拒馬擁之進一步拒馬亦進退不可却官軍
以剗掠去兜鍪大斧斷其臂碎其首敵人以鐵騎分
左右翼號招子馬皆女真為之號長勝軍專以攻堅
戰酣然後用之自用兵以來所向無前至是亦為錡
軍所殺自辰至申敵敗錡以拒馬木障之少休城上
鼓聲不絕乃出飯羹坐餉戰士如平時敵披靡不敢
近食已撤拒馬木深入斫敵人大破之棄屍斃馬血
肉枕藉車騎器甲積如山阜烏珠平日所恃以為強
者十損七八至陳州數諸將之罪皆鞭之遂還汴既
而洪皓自金密奏順昌之捷金人震恐喪魄燕之重
寶珍器悉徙而北意欲捐燕以南棄之故議者謂是
時諸將協心分路追討則烏珠可擒汴京
可復而王師亟還自失機會良可惜也

廣義

大抵人徒知劉錡順昌之捷而不知錡之取是捷者其要有六蓋公心以赴急難一也示

死以堅衆志二也因天變以致敵三也以忠義感人四也示弱以驕敵五也以逸而待勞六也議者以諸將不協心追討而失此機會似矣嗚呼當是時也烏珠擁衆而來敵城難守危如一髮將士有必死之理順昌為必陷之城幸而勝之則心願滿足何暇窮追人情然也何足怪哉臣謂劉錡順昌之捷周瑜赤壁之勝同一機也昔者曹瞞志欲吞吳擁兵臨江旌旗舳艫一望千里吳人為之膽落矣幸而周瑜乘此東風決策一戰而老瞞遁遁不暇幾乎不免吳人之意以為退此勍敵不猶愈於君臣被俘耶由是歡呼凱旋莫不相慶至今以為美談順昌之事何以異於是哉君子待人以恕而無求備之心不當如議者之所云也

岳飛遣兵敗金人於京西

帝賜飛札曰設施之方一以委卿朕不遠度飛乃遣王貴牛皋楊再興李寶等分布經畧西京汝鄭潁昌陳曹光蔡諸群又命梁興渡河糾合忠義社取河東北州縣又遣兵東援劉錡西援郭浩自以其軍長驅以闚中原將發密奏言先正國本以安人心然後不常厥居以示無忘復讐之意飛將李寶牛皋相繼敗金人於京西

樓照罷○遣使諭岳飛班師

時秦檜力主和議奏遣司農少卿李若虛詣飛營諭旨班師

廣義

使無賊檜此舉則剗竹之勢成矣金人豈足敵哉

閏月金人寇涇州經畧使田晟破走之

薩里罕與吳璘楊政夾渭河而陣璘駐兵大嶽嶺薩里罕覘之曰善戰者立於不敗之地此難與爭乃引去趙邠州田晟遣將拒之於青谿嶺胡世將又遣王彥揚從儀分道而出屢戰敗之薩里罕還屯鳳翔既而復出攻涇州田晟據山為陣乘敵壁未定奮兵擊敗之奪其兵馬甚衆薩里罕走還鳳翔

發明

是時金人渝盟憑陵諸夏其禍慘矣然吳璘有扶風之勝劉錡有順昌之勝岳飛有京西

之勝田晟有涇州之勝可見中國之兵猶足禦敵也而賊臣秦檜力主和議詔諭班師則是自失其機會耳前以和自愚而金乃叛盟今以和自守而縱敵攻畧嗚呼金人南侵如故宋人歛兵勿爭而且卑屈講解之檜之罪可勝誅哉綱目比事而書之於冊則其義蓋可見矣

岳飛收復河南州郡

飛攻金人於蔡州破之復其城於是遣張憲敗金韓常於潁昌又復淮寧府邾復鄭州張憲韓清復西京楊遇復南城軍喬湜堅復趙州他將所至皆捷金人大震河南兵馬鈴轄李興聚兵應飛收復伊陽等八縣又汝州金河南尹李成棄城遁走詔興知河南府飛又使張應會興復永安軍

韓世忠遣兵復海州

世忠使王勝等復海州父老哀金帛以犒軍勝不受世忠每出軍必戒以秋毫無犯軍之所過耕夫皆荷鋤而觀

張俊使王德復宿州金人棄毫而遁俊入毫遽還壽春

俊遣統制王德援潁昌兵還就檄德復宿州德倍道自壽春馳至蘄縣與金遊騎遇遂入城偃旗卧鼓遊騎引去德因潛師趨宿州夜半薄金營金人阻汴水邀戰德策馬先濟步騎從之遂謂金人曰吾與爾小大百戰雖名王貴胄莫不糜碎爾何為者金將高統軍遂投兵降守將馬秦馳入城閉門固守德叱其子順先登秦遂降宿州平德乘勝趨亳州與俊會於城父時鄴瓊與葛王烏祿在亳聞德至曰夜又未易當也即遁去德入亳州請於俊曰今兵威已振請乘勝進取俊不從而還初欽宗時德以十六騎徑入隆德府縛金守臣姚太師獻於朝欽宗問狀姚對曰臣就縛時止見夜叉耳由是人呼為王夜叉

發明 不曰還而曰遽還遽者急遽苟且之詞識俊也是時王德敗金勇氣百倍正宜協力進取共復中原可也夫何不從王德之請率兵遽還壽春則俊亦不能辭逗撓之責矣故書遽還以深罪之

安置趙鼎於潮州

秦檜惡鼎居越偪已徙知泉州又諷司諫謝祖信等論鼎嘗受張邦昌偽命遂奪節提舉洞霄宮鼎自泉還復上書言時政檜忌其復用又諷中丞王次翁論其乾沒都督府錢十七萬緡謫官居興化軍次翁及右諫議大夫何鑄論之不巳乃貶清遠軍節度副使潮州安置

秋七月以王次翁參知政事

秦檜薦次翁為中丞故凡可以為檜地者無不力為之及金人敗盟帝下詔罪狀烏珠次翁懼檜得罪因奏曰前日國是初無主議事有小變更用他相後來者未必賢而排黜異黨紛紛累月不能定願陛下以為至戒帝深然之檜德其言遂引同列由是益安據其位公論不能撼搖矣

岳飛擊走金烏珠於郾城追至朱仙鎮大破之遣使修治諸陵

飛留大軍於潁昌命諸將分道出戰自以輕騎駐郾城兵勢甚銳烏珠大懼會諸帥欲併力一戰飛問之曰金人技窮矣乃日出挑戰且罵之烏珠怒合龍虎大王蓋天大王及韓常之兵逼郾城飛遣子雲領騎兵直貫其陣戒之曰不勝先斬汝雲與金人戰數十合金屍布野烏珠以拐子馬萬五千來飛戒步卒以麻札刀入陣勿仰視第斫馬足拐子馬相連一馬仆二馬不能行飛軍奮擊遂大破之烏珠大慟曰自海上起兵皆以此勝今已矣乃復益兵而前飛自以四十騎突戰敗之烏珠憤甚合師十二萬次於臨潁楊再興以三百騎遇之於小商橋驟與之戰殺二十人及萬戶薩巴千戶百人再興死之獲屍焚焉得箭鏃二

升飛痛惜之張憲繼至復戰烏珠夜遁追奔十五里
中原大震飛謂子雲曰賊屢敗必還攻潁昌汝宜速
援王貴旣而烏珠果至貴將游俠雲將背嵬戰於城
西雲以騎兵八百挺前決戰步卒張左右翼繼之殺
烏珠壻夏金吾飛又使梁興會太行忠義兩河豪傑
敗金人於垣曲又敗之於沁水遂復懷衛州斷金人
山東河北之道金人大恐飛進軍朱仙鎮距汴京四
十五里與烏珠對壘而陣遣背嵬騎五百奮擊大破
之烏珠還汴飛檄陵臺
令行視諸陵葺治之

發明

直書擊走蓋深幸之也自中原淪陷諸陵廢
祀雖有忠臣義士徒能北望慨想而已今飛

進軍討罰遂能修治諸陵亦足少伸臣子之情矣
綱目詳而書之蓋予之也如晉書桓溫敗姚襄入

洛陽修謁
諸陵同義

以楊沂中為淮北宣撫副使

劉錡為

判官

岳飛奉詔班師還鄂河南州郡復陷於金

兩河豪傑李通等帥衆歸飛由是金人動息山川險要飛皆得其實中原盡磁相澤潞晉絳汾隰之境皆期日興兵與官軍會其所揭旗以岳為號父老百姓爭挽車牽牛載糗糧以饋義軍頂盆焚香迎候者充滿道路自燕以南金人號令不行烏珠欲僉軍以抗飛河北無一人應者乃嘆曰自我四北方以來未有如今日之挫衄金烏陵阿思謀素驍勇桀黠亦不能制其下但諭之曰毋輕動待岳家軍來即降金將王鎮崔慶李凱崔虎華旺等皆率所部降飛龍虎大王之將噶克察亦密受飛旗榜自其國來降韓常亦欲

以衆五萬內附飛大喜語其下曰直抵黃龍府與諸君痛飲耳方指日渡河而秦檜欲畫淮北與金和諷臺臣請班師飛奏金人銳氣沮喪盡棄輜重疾走渡河而我豪傑向風士卒用命時不再來機難輕失檜知飛志銳不可當乃先請張俊楊沂中等歸而後上言飛孤軍不可久留乞連召還飛一日奉十二金字牌乃憤惋泣下東而再拜曰十年之力廢於一旦乃自郾城引兵還民遮馬痛哭訴曰我等迎官軍金人皆知之相公去我輩無類矣飛亦悲泣取詔示之曰吾不得擅留哭聲震野飛留五日以待民徙從而南者如市飛亟奏以漢上六郡間田處之初烏誅敗於朱仙欲棄汴而去有書生叩馬曰太子毋走岳少保且退烏珠曰岳少保以五百騎破吾十萬京城日夜望其來何謂可守生曰自古未有權臣在內而大將能立功於外者岳少保且不免況欲成功乎烏珠悟遂留不去及飛還烏珠遣兵追之不及而河南新

復府州皆復為金有飛至鄂力請解兵柄
不許已而入覲帝問之飛拜謝而已

發明

嗚呼宋事至此浸不可為矣是時諸將進取
所向有功金兵敗亡心喪膽落而中原之民

華食壺漿以迎王師誠應天順人機不可失之際
也苟能假以歲月莫或捷之如易云高宗伐鬼方
三年克之則不惟舊疆可復而幽燕亦可復不惟
禦和可清而沙漠亦可清惜其功業粗布沮抑復
生使忠臣義士徒有黍離之嘆終不能過河與之
一決可哀也已由是飛甫班師河南隨陷是則宋
人知有江南而不知有江北噫周天所以限南北
也雖然班師之計皆秦檜所為其欺君誤國摧殘
難數是同萬世之罪人也或以飛雖被詔違而前
進克復舊物以功贖罪不亦可乎曰禮君命召不
俟駕違而前進則是有跋扈不臣之心況十二金
牌一日迭至雖功蓋天下罪亦難贖君子其肯蒙

首惡之名哉綱目據事而詳書於策則惜之之意為可見矣

廣義

武穆嘗言以曲直為老壯以逆順為強弱蓋烏珠敗盟此可見曲逆在金而直順在宋宋

常取勝此可見壯強在宋而老弱在金故自順昌之捷以來無將不勝無地不復者武穆之言驗矣或曰然則武穆奉詔而還何如曰不能處權變也曰若武穆者正所以守經也守經乃所以行權也何不能權之有曰不然權者經之所自出權變之中自有一定不易之理乃所以為經也非經能守而即可以為權經而非權則子莫之中矣故曰權而得中是乃禮也甫刑云惟齊非齊有倫有要此之謂與若武穆奉詔還師則是不能用權也權既失矣惡在其為守經哉昔者舜不告而娶嫂溺援之以手孟子皆許其權若以守經言之舜娶必告嫂溺不援為當也然舜娶必告必無後也嫂溺不

援必致死也。嫂謂之守經可乎？然後知舜娶不告者，非不孝也。嫂溺必援者，非盜嫂也。乃所以行其權也。權不失，正非經。而何使舜必告而娶？尾生考已之行，嫂溺不援，以手對狼禽獸之心，皆不得謂之權也。漢宣帝時，有甘延壽、陳湯者，奉使西域，矯制誅斬郅支單于於康居。後來宣帝因劉向之說，不罪二人，反封侯爵。且宣帝何如主也？決非高宗之庸闇。武穆何如將也？決非甘陳之寡謀。又况金敵大讐，決非郅支單于之比。於時即當駐師郾城，遣野馳奏曰：「臣以却敵之功，成在旦夕。」詔旨諭臣，臣不敢奉容，臣盡取敵人獻於太廟，以復不共戴天之讐。願伏矯詔之罪，身潤鼎鑊，甘心無悔。如此則蓋世之功，武穆收之，何至父子同死？奸賊之手哉！曰：史稱武穆好春秋，何其招禍之酷也！曰：經文用權，左傳載事，武穆之所好者，特左傳而已。已彼聖經如化工，武穆想未之及也。

八月貶秘閣脩撰張九成等官

九成等皆言和議非計秦檜惡之乃貶九成知邵州
喻樗知懷寧縣陳綱中知安遠縣凌景夏知辰州樊
光遠閩州學教授毛叔度嘉州司戶參軍九成從楊
時學紹興初舉進士對策直言無隱及為刑部侍郎
會金人議和九成言於趙鼎曰金寶厭兵而張虛聲
以撼中國耳因陳十事云彼誠能從吾所言則與之
和使權在朝廷鼎罷相檜誘之曰且成檜此事九成
曰九成胡為異議特不可苟安耳檜曰立朝須優游
委曲九成曰未有枉已而能直人者帝問以和
議九成對曰敵情多詐不可不察檜尤惡之

發明

甚矣小人之妨賢病國也疾良善則如讐隙
犯刑憲則如飲食以同已者為賢以異已者

為佞九成等同言和議之非見忤秦檜之意貶黜
於外果何為乎意此乃秦桧而否城復於隍之時

也然則小人之禍可勝言哉敗
非其罪故書敗而不去其官

楊沂中軍潰於宿州走還泗金人屠宿州

沂中兵至宿州金遣問告敵騎數百屯柳子鎮沂中
自將五百騎夜襲之不見敵而還金人以精兵伏歸
路沂中軍潰遂自壽春
走歸泗金人屠宿州

九月遣使諭韓世忠罷兵還鎮

時諸大帥
皆還鎮

金殺其左丞相古紳右丞相蕭慶

發明

古紳蕭慶之殺考之分注皆不載其故是必
無故而殺之者也無故而殺大臣謂之善治

國可乎故稱國以救而不
去其官見金之失政刑矣

○冬十月金薩里罕陷慶陽河東經畧使王忠植死之

忠植本河東步佛山忠義人以復石代等十一州功
授河東路經畧安撫使及薩里罕犯慶陽知府朱萬
年拒守胡世將檄忠植以所部救慶陽行次延安叛
將趙惟清執忠植詣薩里罕薩里罕使甲士引至慶
陽城下諭降忠植大呼曰我太行忠義也為金所執
使來招降願將士勿負朝廷堅守城壁薩里罕怒詰
之忠植披襟曰當速殺我遂害萬年以
城降後贈忠植奉國軍節度使諡義節

發明

忠植之救慶陽而為叛將趙惟清所執觀其
大呼城中之言苟非明於舍生取義之道者

其能然乎是故義之所在則生有所不用也有所
避患而有所不為也由其必有秉彜之良心故能

舍生而取義否則烏能若是哉特書死之予全義也

臨安火

發明 是時宋已定都臨安其不曰京師者宋棄汴而不守不予其都臨安也蓋天火曰災人火

曰火秦檜專權自恣妬害忠良臨安之火安知非秦檜為之不然何以直書其火乎

○十一月金封孔子後璠為衍聖公

時金主興禮樂立孔子廟於上京求孔子後得四十九代孫承奉即璠遂封之

發明 金崛起邊陲以入中國士馬精強所向無敵天之所興誰能廢之固也乃復修明禮樂崇

尚聖教安得不垂予之哉此固書法之意也雖然中國不競而使敵人得以從容講求文物金運自

此昌矣其如宋室何哉噫
此蓋君子傷時之意云爾

十二月金始置屯田軍於中原

金既取河南猶慮中原士民懷貳始創屯田軍凡女
真係契丹之人皆自本部徙居中州與百姓雜處計
其戶口授以官田使自播種春秋量給其衣若遇出
師始給錢米凡屯田之所自燕南至淮隴之北俱有
之皆築壘
於村落間

發明

置屯田於中原則兵民雜處且耕且守民無
疑貳之意兵有就餉之資而中原沒不可復

矣特書曰始所以
子金而惜宋也

辛十一年

金皇統元年

春正月金烏珠陷壽春入廬州詔張

俊等將兵救之二月王德復和州

烏珠自敗後留屯京毫出入許鄭之間簽兩河軍與
舊部几十餘萬以謀再舉及聞秦檜召諸軍還乃攻
陷壽春遂渡淮入廬州詔張俊楊沂中帥兵赴淮西
岳飛進兵江州尋詔韓世忠引兵往援時烏珠自合
肥趨歷陽游騎至江張俊議分軍守南岸王德曰淮
者江之蔽也棄淮不守是謂唇亡齒寒敵數千里遠
來餉道決不繼及其未濟急擊之可以奪氣若遲之
使少安則淮非吾有矣因請而行即渡采石俊督軍
繼之宿江中德曰明旦當會歷陽已而夜拔和州晨
迎俊入烏珠退保昭關尋復爭和州俊擊敗之既而
德又敗韓常於含山縣東又敗
烏珠於昭關復含山及昭關

金人陷商州邵隆復之○楊沂中劉錡敗金烏珠於柘

臯遂復廬州

劉錡自太平渡江與張俊楊沂中會而廬州已陷錡乃與閔師古據東閩之險以遏敵兵出清溪兩戰皆捷烏珠以拓臯地坦平利於用騎因駐師錡進兵與烏珠夾石梁河而陣河通巢湖廣二丈錡命曳薪壘橋須火而成遣甲士數隊踰橋卧槍而坐遣人會合張俊楊沂中之師翌日沂中及王德田師中張子蓋諸軍俱至惟俊後期錡與諸將分軍為三並進渡河以擊之師古欲俟俊至王德田曰事當機會復何待即與錡上馬先迎敵沂中繼之烏珠以鐵騎十餘萬分為兩隅夾道而陣德田曰敵右陣堅我當先擊之麾軍渡河首犯其鋒一人被甲躍馬而出德田引弓一發斃之乘勝大呼馳擊諸軍鼓譟從之金人以拐子馬兩翼而進德率衆粗戰沂中曰敵恃弓矢吾有以屈之使萬人持長斧如牆而進敵遂大敗德與錡等追之

又敗於東山敵望見驚曰此順昌旗幟也即走保紫金山是役也失將士三百人金人死者以萬計既而烏珠復親帥兵逆戰於店步沂中等又敗之乘勝逐北遂復廬州

發明

小人之誤國至是益見矣方諸將進取有功所向克捷而力主和議召之班師苟使盟誓

可結則必南北弭兵各不相犯今而宋則恃和息兵金則挾和脩戰自諸將還鎮之後如屠宿州陷慶陽陷壽春入廬州陷商州攻城畧地無時休息嗚呼縱不能恢復中原獨不能保守淮甸而相繼陷淩江表震驚然則和之一字果可以欺天下乎綱目一書再書不一而足所以深罪當時垂戒後世也

金命致仕官至三品者給半俸○金追封昏德公為天

水郡王封重昏侯為天水郡公

又封耶律延禧為豫王

金主親祀孔子

發明

春秋之法中國而夷狄則夷狄之夷狄而中國則中國之金給致仕官半俸則優禮群臣

之道隆親祀孔子則尊崇先聖之道至雖中國令主何以加茲綱目特書於冊者豈不以一代賢君

予之哉

○三月張俊楊沂中劉錡奉詔班師金人陷濠州俊使

沂中救之敗績

張俊楊沂中劉錡奉詔班師行幾數里諜報金人攻濠州甚急俊乃復邀沂中錡曰會於黃連埠同往援距濠六十里而濠南城已陷俊召諸將謀之沂中欲戰錡曰本來救濠今濠已失追無所倚不若退師據險徐為後圖諸將皆曰善三師鼎足而營或言敵兵已去錡謂俊曰敵得城遽退必有謀也宜嚴兵備之俊不聽且欲自以為功命錡無往而令沂中與王德將神勇步騎六萬直趨濠州列陣未定烟起城中金人伏騎萬餘分兩翼出沂中顧德曰何如德曰德小將安敢議事沂中以策麾軍曰那回諸軍以為令其走也遂潰而南無復紀律金人追之死者甚衆韓世忠帥師至城下亦不利而退沂中遂入滁州俊軍入宣化錡軍竊塘方食俊遽至曰敵兵已近奈何錡曰楊宣撫兵安在俊曰已失利還矣錡謂俊毋恐請以步卒禦之宣撫試觀焉錡麾麾下皆曰兩大帥軍已渡我軍何苦獨戰錡曰順昌孤城旁無赤子之助吾提

兵不滿二萬猶足取勝況今得地利又有銳兵耶遂設三覆以待俄而俊至曰謀者妄也戚方殿後之軍耳乃皆還鎮俊歸建康斜歸太平沂中歸臨安

廣義

或曰自岳武穆後諸將奉詔班師者如何曰可也曰何由知其可也曰諸將武穆之事不

同也曰不同者何曰武穆之成功什有八九所爭者一二耳諸將行師之時金人之氣復壯若矯詔不還安能必其功之成乎矯詔不可也若武穆之時金人之氣銷沮殆盡矯詔不還可必功之立就也矯詔可也通時達權奚可執一論哉

岳飛帥兵救濠州不及還次舒州

飛將救濠州秦金人舉國南來其內必虛若長驅京洛以持之彼必奔命可坐而敵帝不從飛方苦寒嗽

力疾而行又恐帝急於退敵乃奏臣如搆虛勢必得
刊若以敵方在邇未暇遠圖欲乞親至蘄黃以議攻
却帝乃詔飛會師蘄黃飛至潁
而城已陷遂還兵舒州以俟命

發明

凡書救善之也是時飛已班師聞潁受圍率
兵往救雖已陷敵弗克成功然其忠君之心
不亦誠乎救在遠者則罪在近者當時張浚諸
人不能辭其責矣還次舒州不得已之意也

金烏珠渡淮北去○夏四月孫近罷○以韓世忠張俊
為樞密使岳飛為副使

秦檜力主和議恐諸將難制欲盡收其兵權給事中
范同獻計於檜請除韓世忠張俊岳飛樞府則兵柄
自解檜喜乃密奏柘臯之捷召三將赴行在論功行
賞於是世忠俊皆入朝飛至獨後檜用王次翁計俟

之七日既至遂拜世忠俊樞密使飛為副使並宣押至樞府治事加楊沂中開府儀同三司賜名存中王德清遠軍節度使而進范同為翰林學士

罷三宣撫司五月詔張俊岳飛如楚州閱軍

張俊知秦檜欲罷兵首請以所部隸御前且力贊和議檜深喜之遂罷三宣撫司以其兵隸御前遇出師臨時取旨又置三總領所於湖北淮東淮西以統諸軍錢糧時更軍制之初將士多不安乃命浚飛往淮東撫韓世忠之軍初飛在諸軍中年少以列校拔起累立顯功張俊不能平飛屈已下之淮西之役俊以糧乏怵飛飛不為止帝賜札褒諭有曰轉餉難阻卿不復顧俊疑飛漏語還朝反倡言飛逗留不進以乏餉為辭至是俊知世忠忤檜欲與飛分其背嵬軍飛義不背俊大不悅既至楚張俊欲修城為備飛曰當

戮力以圖恢復豈可為退保計俊變色會世忠軍吏
景著與總領胡昉言樞密若分世忠軍恐至生事昉
立之朝檜捕著下大理將以扇搖誣世忠飛馳書告
以檜意世忠見帝自明俊於是大憾飛遂密以飛報
世忠事告檜檜大怒俊飛既還飛遂不復出
掌兵其僚屬多乞宮祠而去俊每獨出視師

廣義

張俊依違小人也何以處大事決大義
哉其乘時射利如此於心得無愧乎

六月進秦檜為尚書左僕射○秋七月以范同參知政
事○罷淮北宣撫判官劉錡

錡自順昌之捷聚費張俊楊存中嫉之至是二人言
於朝曰淮西之役岳飛不赴援劉錡戰不力秦檜信
之遂罷錡兵命
錡至荆南府

廣義

諸將不協敵國之利而姦人得計也自此便覺南宋氣脉蕭索矣

八月立祚德廟於臨安

祀晉程嬰公孫杵臼韓厥也

罷知温州王居正

居正立朝累與秦檜忤且力辨王安石父子學行之非自兵部侍郎出知温州居正知不為檜所容以目疾請祠杜門言不及時事客至談論經史而已檜猶忌之諷中丞何錡劾居正為趙鼎汲引欺世盜名奪職奉祀居正之學根據六經楊時器之出所著三經義解示居正曰吾舉其端子成吾志居正感勵首尾十載為詩書月禮辨學三十九卷與時書同進二書行天下遂不復言王氏學

發明

無道之世其政事設施無非乖舛然沒而不書則無以見亂離之由姑以是歲觀之書韓

世忠等入樞府則見其計收兵柄書罷三宣撫司則見其自沮戰功書進秦檜尚書左僕射則見其尊用權姦書范同參知政事則見其寵信逆黨書罷劉錡則見其信小人而黜君子書罷王居政則見其疏正士而近姦諛夫以一歲之間畧無一善可書則謬妄從可知矣故凡易治而亂轉安而危是豈一朝一夕之積高宗銳意和戎委政秦檜竟忘戴天之讐偷安忍辱其禍至於宋亡而未已綱目特書屢書蓋亦有不獲已焉耳蓋亦有不獲已焉耳

廣義

自古邪不能害正也然能害之於暫不能害之於久譬諸陰霾毒霧安能常蔽白日乎昔

也龜山居正之書不出王氏邪說盛行二君之書一出則王氏邪說遂沮二君其有功於聖門也多矣

罷岳飛奉朝請

飛以恢復為己任不肯附和議嘗讀檜奏至德無常師主善為師之語恚曰君臣大倫根於天性大臣而忍面欺其主耶烏珠遺檜書曰汝朝夕以和請岳飛方為河北圖必殺飛始可和檜亦以飛不死終梗和議已必及禍故力謀殺之遂諷中丞何鑄侍御史羅汝楫諫議大夫万俟卨等交章論飛奉旨援淮西暫至舒蘄而不進比與張俊按兵淮上欲棄山陽而不守乃罷為萬壽觀使奉朝請

發明

孟子曰無罪而殺士則大夫可以去無罪而戮民則士可以徙張良相漢滅楚而辟穀歸

山范蠡輔越平吳而五湖遠遁至若張翰之思鱸二疏之請老又莫非見幾而作者也蓋位極者勢危功高者不賞岳飛處危疑之勢立不賞之功張俊忌之於前秦檜忌之於後金人忌之於外群小

忌之於中苟能見幾明決則投簪而退解組而歸
儉德避難以脫小人之厄可也不能以此自圖而
乃陷其坎窞自是而罷官自是而繫獄自是而屈
辱自是而遭刑父子一門畧無庶類其禍豈不慘
哉一念不謹而貽後憂岳公亦昧於進退之機
云爾綱目書此始為秦檜罪而終為岳飛惜也

九月吳璘等收復陝西諸州詔班師還鎮

吳璘進兵拔秦州開金統軍和珍與希卜蘇合兵五
萬屯劉家園請於胡世將擊之世將問策安出璘曰
有新立疊陣法每戰以長鎗居前坐不得起次最強
弓次強弩跪膝以俟次神臂弓約敵相搏至百步內
則神臂先發七十步強弓併發次陣如之凡陣以拒
馬為限鐵鉤相連俟其傷則更代代則以鼓為節騎
兩翼以蔽於前陣成而騎退謂之疊陣世將善之諸
將竊議曰吾軍其殲於此乎璘曰此古來伍令也軍

法有之諸君不識耳得車戰餘意無出於此戰士心
定則能持萬敵雖銳不能當也遂進次劉家灣時和
珍希卜蘇據險自固前臨峻嶺後控臘家城謂璘必
不敢輕犯先一日璘會諸將問所以攻姚仲曰戰於
山上則勝璘然之乃請戰敵皆笑半夜璘遣姚仲王
彥卿杖渡河陟峻嶺截坡上約二將上嶺而後發火
二將至嶺寂無人聲軍已畢列萬炬齊發敵駭愕曰
吾事敗矣希卜蘇善謀和珍善戰二人異議璘先以
兵挑之和珍果出鏖戰璘以壘陣法更迭戰輕裘駐
馬亟麾之士殊死鬪金人大敗降者萬人和珍走保
臘家城璘圍而攻之城垂破朝廷方主和議以驛書
詔班師時璘拔秦州其勢方張陝西河東首領爭來
附而楊政拔隴州及破岐下諸屯郭浩復華州入陝
州矣詔至璘即自臘家城引兵還河池浩還延安政
還鞏世將惟
浩歎而已

莫將還自金

烏珠欲議和莫將久留於金乃縱之歸以道意秦檜遂奏遣劉光遠為通問使

冬十月詔以魏良臣為金國稟議使

烏珠遣劉光遠還要官尊望著者為使秦檜乃奏遣良臣

秦檜矯詔下岳飛於大理獄

秦檜必欲殺飛乃與張俊謀密誘飛部曲能告飛事者優與重賞卒無應者俊聞飛嘗欲斬統制王貴又嘗杖之乃誘貴告飛貴不肯曰為大將寧免以賞罰用人苟以為怨將不勝其怨俊因劫以私事貴懼而從之檜又問飛統制王俊善告許號鵬兒以姦貪屢為張憲所抑使人諭之王俊許諾於是檜謀以張憲

王貴王俊皆飛部將使其徒自相攻發因以及飛父子庶母不疑俊時在鎮江乃自為狀付王俊妄言副都統制張憲謀據襄陽還飛兵柄令告王貴使貴執憲赴鎮江行樞密府憲未至俊預為獄以待之屬吏王應求白俊以為樞院無推勘法俊不聽親行鞠鍊使憲自誣謂得飛子雲手書命憲營還兵計憲被掠無完膚竟不伏俊手自具獄成告檜械憲至臨安下大理寺獄檜奏召飛父子證憲事帝曰刑所以止亂勿妄追證動搖人心檜矯詔召飛父子使者至飛第飛笑曰皇天后土可表此心遂與雲就獄檜命中丞何鑄大理卿周三畏鞠之鑄引飛至庭詰以反狀飛裂裳以背示鑄有舊涅盡忠報國四大字深入膚理既而閱實俱無驗鑄察其寃白檜檜曰此上意也鑄曰鑄豈區區為岳飛者強敵未滅無故戮一大將失士卒心非社稷之長計檜語塞乃改命諫議大夫万俟卨與飛有怨遂誣飛令於鵬孫革致書張憲王

貴令虛中報情以動朝廷雲與憲書令措置使飛還軍且云其書已焚飛坐繫兩月無可証者或教高以臺章所指准西逗留事為言高喜白檜簿錄飛家取所賜御札與往來道途日月皆可攷乃收其御札送官藏之以滅跡高又使鵬革等證飛受詔逗留命評事元龜年取行軍時日雜定之傳會其獄大理卿薛仁輔寺丞李若樸何彥猷皆言飛無辜判宗正寺士懷請以百口保飛無他且曰中原未靖禍及忠義是忘二聖不欲復中原也皆不聽韓世忠心不平詣檜詰其實檜曰飛子雲與張憲書雖不明其事莫須有世忠曰莫須有三字何以服天下人也

發明

矯詔者專執無君之詞楊氏曰小人設險中之險以陷君子坎之初六陰柔之小人設險

以陷君子猶為未又設險中之險坎險也當險中之險也蓋君子小人勢不兩立金人所忌者惟飛

而秦檜所忌者亦飛以為不早驅除終梗和議是
以必欲害之也誣以謀反同險矯詔下獄此非險
中之險乎秦檜主之張俊万俟卨又從而成之妄
掣張憲桎連岳飛身受非刑羅織抵罪嗚呼檜何
讐於飛飛何負於檜耶此誠天地之大變人心所
不容檜之罪又可得而粉飾之哉故書檜詔所以
著其無君之罪書下岳飛大理獄所以明其誣累
之非即綱目之所書驗當時之政治則宋事之興
廢可知矣

廣義

少保當時若矯詔進兵而得罪
豈不愈於賊檜矯詔而殺已耶

韓世忠罷

世忠深以和議為不然及魏良臣使金世忠諫曰中
原士民苦於兵革其間豪傑莫不延頸以俟弔伐之

師若自此與和日月侵尋人情銷弱國勢委靡誰復振之北來之使乞與面議復抗疏言秦檜誤國之罪檜諷言官論之帝不聽而世忠連疏乞罷遂罷為醴泉觀使封福國公世忠自是杜門謝客絕口不言兵時跨驢携酒從一二童奴縱游西湖以自樂澹然若未嘗有權位者平時將佐罕得見其面

廣義

世忠之識過武穆所謂烏見弓而高飛魚驚鉤而遠逝賊檜之勢可畏矣

十一月范同罷○安置李光於藤州

秦檜忌光諷中丞万俟卨論光陰懷怨望與孫近朋比安置藤州藤州守臣以光詩有諷刺者獻於檜檜怒令言者論之再貶瓊州

和議成以何鑄簽書樞密院事奉表稱臣於金

烏珠以蕭穀邢具瞻為審議使與魏良臣偕來議以
淮西為界求割唐鄧二州及陝西餘地歲幣銀絹各
二十五萬仍許歸梓宮太后帝悉從其請命宰執告
祭天地宗廟社稷命鑄往使誓表畧曰臣構言今來
盡疆以淮水中流為界西有唐鄧州割屬上國自鄧
州西四十里并南四十里為界屬鄧四十里外并西
南盡屬光化軍為樊邑沿邊州城既蒙恩造許備藩
方世世子孫謹守臣節每年皇帝生辰并正旦遣使
稱賀不絕歲貢銀絹二十五萬兩疋自壬戌年為首
每春季差人般送至泗州交納有渝此盟明神是殛
墜命亡氏陪其國家臣今既進誓表伏望上國早降
誓詔庶使弊邑永為憑焉穀辭帝諭曰若今歲太后
果還自當謹守誓約如今歲未也則誓文為虛設鑄
至汴見烏珠遂如會寧烏珠尋遣人來復求商州及
和尚方

山二原

發明

春秋莊九年書公及齊大夫盟於莒君子譏公之釋父怨親仇讐成二年書公會楚公子

嬰齊於蜀君子譏其中國諸侯降班失列下與夷狄大夫會也然而春秋所最重者父母之讐所最謹者統系之辨高宗惑賊檜之邪謀恃和盟之陋策忘親釋怨隆尊居卑名義甚悖蓋漢亦曾和單于不過賜之以玉帛妻之以公主唐亦嘗和突厥不過遺之以歲幣加之以可汗五代石敬瑭借兵契丹稱臣奉貢此非一統之主君子猶且譏之宋自真宗訂盟耶律南兄北弟僅克比肩高宗受命中原與天下共主言地則多於敬瑭言名則正於晉氏而乃君父於金苟焉無恥胡銓嘗曰以祖宗之天下為余人之天下以祖宗之位為金國藩臣之位陛下下一屈膝則祖宗廟社之靈辱於異姓祖宗數百年之赤子委之敵國且稱藩奉貢云者非其有而得之如劉豫張邦昌之徒則志得意滿舉天

下而臣之甘心焉高宗所居者祖宗之位所守者祖宗之業祖宗土地不能恢復父母讐恥不能報償易怨而為恩忘哀而作喜貶國為邑自卑尊人雖至愚者弗克忍為高宗樂而行之是誠何心哉觀之誓表尤可慚赧是蓋天地晦冥日月薄蝕足為上而首為下其屈辱亦已甚矣將何顏而處臣民之上將何詰勅以謁祖宗墳陵則雖帝有江南奚足貴耶綱目直書於冊不再貶而其失自見

廣義

嗚呼用奸臣殺良將甘心降敵而忘父兄母妻之大讐者此高宗之素志也君子奚獨罪

檜哉綱目大書奉表稱臣於金者所以遺其萬年之笑也人以南渡為中興謬矣

遣使割唐鄧商秦之地以畀金

京西割唐鄧二州陝西割商秦之半止存上津豐陽天水三縣及隴西成紀餘地棄和尚方山二原以大

散關為界於是宋僅有兩浙兩淮江東西湖南北西
蜀福建廣東西十五路而京西南路止有襄陽一府
陝西路止有階成和鳳四州凡有府州軍監一百八
十五縣七百三金既畫界建五京置十四總管府凡
十九路其間散府九節鎮三十六守禦郡二十二刺
史郡七十三軍十有六縣六百三十二○初邵隆在
商州十年披荆榛瓦礫以為治招徠流散屢敗金人
終不肯離商而去值和議成割商與金隆嘗快快徒
知金州嘗以兵出敵境秦檜恨
之徙知叙州檜陰使人酰之

發明

家人求和於金者必有所利而為之焉奉表
稱臣極甘屈辱而金人未聞有一毫利宋反

為割地以附益之且唐鄧商秦宋之故土高宗即
位十五年未能復侵軋之咫尺而乃棄其四州割
以陷敵則是敵不忘一族而得四州之地也是時
宋之境內僅有十五路而金之境內乃有十九路

由此觀之三分天下金有其二宋得其一耳自是以後偷安一隅粉飾太平諱言兵事宋之所謂中興之業者止於如此而已矣豈不深可哀哉天下未一讐恥未雪而先為自盡之計高宗誠五霸之罪人也綱目特書於策所以惡其釋父怨親仇讐之意云

秦檜殺故少保樞密副使武昌公岳飛

歲已暮而飛獄不成一日檜手書小紙付獄即報飛死矣年三十九雲與張憲皆棄市於鵬等從坐者六人籍飛家資徙之嶺南於是薛仁輔李若樸何彥猷皆被黜布衣劉允升上書訟飛冤下大理獄死凡傳成其獄者皆進秩洪皓在金以蠟書奏金人所畏服者惟飛至以父呼之及聞其死諸將酌酒相賀飛事親孝家無姬侍吳玠素服飛願與交歡飾名姝遺之飛曰主上宵旰豈大將安樂時耶却不受玠益敬服

帝欲為飛營第飛辭曰金兵未退何以家為或謂天下何時太平飛曰文臣不愛錢武臣不惜死天下太平矣卒有取民麻一縷以束芻者立斬以徇卒夜宿民間門顧無敢入者軍號凍死不拆屋餓死不攜掠卒有疾飛躬為調藥諸將遠戍飛遣妻問勞其家死事者哭之而有其孤或以子婚其女凡有頒犒均給軍吏秋毫不私善以少擊衆嘗以八百人破群盜王善等五十萬衆於南薰門以八千人破曹成十萬衆於桂嶺其戰烏珠於潁昌則以背嵬八百於朱仙鎮則以五百皆破其衆十餘萬凡有所舉盡召諸統制與謀謀定而後戰故有勝無敗猝遇敵不動故敵為之語曰撼山易撼岳家軍難張俊嘗問用兵之術飛曰仁信智勇闕一不可飛好賢禮士覽經史雅衆投壺恂恂如書生每辭官必曰將士効力飛何功之有然忠憤激烈議論持正不少挫於人卒以此得禍馬史臣曰西漢而下若韓彭絳灌之為將代不乏人

求其文武全器仁智並施如岳飛者一代宜多見哉而卒死於秦檜之手蓋飛與檜勢不兩立使飛得志則金讐可復宋恥可雪檜得志則飛有死而已昔檀道濟曰自壞汝萬里長城高宗忍自棄其中原故忍殺飛鳴呼冤哉

發明

甚矣小人之心殘忍而酷暴也欲執國命則志在欺主欲行私意則志在妨賢蓋不欺主

則權勢有不可專不妨賢則私意有不可遂趙高欲專權則矯詔以殺扶蘇秦檜欲和金則矯詔以殺岳飛皆異世而同符者也然既稱臣於金又割地以畀金所求必遂無顧不從宜乎金之報聘也何待次年始有冊帝歸喪之事耶則知割地稱臣猶未足以快敵既殺岳飛金人相慶始遣報使尚北弭兵則賊檜之與金為一可見矣嗚呼賊檜姦邪固不足責高宗忘讐事敵挈全國以付秦檜任

其所為弗與之較欲稱臣則從其稱臣欲割地則聽其割地欲殺岳飛則順其殺飛黃帝堯舜垂衣裳而天下治豈若是之無為乎殺者殺無罪也書殺而不去其官所以明其無罪耳考之前史皆以殺飛為文綱目歸獄於檜變文直書秦檜殺故少保樞密副使武昌公岳飛具官書爵檜豈得而擅殺之手原情定罪立法謹嚴然後是非正曲直分賊檜之貶君僭竊之罪不容掩矣凡若此類微君修之

子莫能

廣義

此何以書秦檜殺書秦檜殺者所以著賊檜專殺無君之心也然則於岳飛書故少保樞

密副使武昌公者何書此者所以復其銜以申萬古之冤也

壬戌十二年

金皇統二年

春二月進封建國公瑗為普安郡王

封崇國公璩
為恩平郡王

詔諸州脩學宮○何鑄還自金

初蕭穀至臨安帝曰朕有天下而養不及親徽宗無
及矣今立信誓明言歸我太后朕不恥和不然朕不
憚用兵及何鑄曹勛往帝召至內殿諭之曰朕北望
庭闈無淚可揮卿見金主當曰慈親之在上國一老
人耳在本國則所繫甚重以至誠說之庶彼有感悟
至金首以太后為請金主曰先朝業已如此豈可輒
改曹勛再三懇請金主乃許之遂遣鑄還
許歸徽宗及鄭后邢后之喪與帝母韋氏

三月放齊安王士懷於建州

秦檜惡其
救岳飛也

四川宣撫副使胡世將卒以鄭剛中代之

剛中節制諸將極嚴每入謁必先庭揖然後就坐吳璘陞少師語主閭吏乞講釣敵之禮剛中曰少師雖尊猶都統制爾倘變常禮是廢軍容璘皇恐聽命

夏四月金使人以袞冕來冊帝

金遣左宣徽使劉苦以袞冕圭冊冊帝為大宋皇帝

發明

宋於金則書奉表稱臣金於宋則書以袞冕來冊冊帝中國僅同藩位足上首下至是極矣

貶中國之鴻名受他人之封號悲夫綱目書此蓋亦有不得已焉者可哀也哉

廣義

分注云冊帝為大宋皇帝噫金人向嘗冊劉豫為大齊皇帝今其冊命與豫同者劉豫高

宗也胡銓之言驗矣

五月初置榷場於盱眙

其後又置於光州東陽安豐軍金亦置榷場於壽鄧州鳳翔府

六月安置王庶於道州○何鑄罷

秦檜以鑄不傳會岳飛之獄怨之諷万俟卨論其過欲罷諸嶺表帝不許遂出知徽州後復責授秘書少監徽州居住

八月以万俟卨參知政事○金人歸徽宗皇帝顯肅皇后鄭氏及懿節皇后邢氏之喪

喪至帝易總服
奉安龍德別宮

發明

春秋之法凡書歸者請而得之也來歸者心服而歸之也高宗備受屈辱而父母不得生

還徒以哀丐於金僅歸昔者靈輶抑不知父母旅魂抱恨泉壤亦已久矣詩云永言孝思孝思維則使高宗苟能明此則必汗顏恚憤而思必報其讐豈肯苟且而已哉則是高宗惟冀和議速成而不
知大讐必報也綱
目書此乃深貶之

皇太后韋氏至自金

后有知慮初聞金人許還三梓宮后恐其反覆呼從者畢集然後起攬宮時方暑金人憚行后慮有他變乃陽稱疾須秋涼進發已而稱貸於金使得黃金三十兩以犒其衆由是途中無虞帝至臨平奉迎見后

喜極而泣后至晚
安入居慈寧宮

九月以孟忠厚為樞密使

充攢宮
總護使

大赦加秦檜太師封魏國公

以和好
成也

發明

臣為不宜加也書曰任官惟賢才左右惟其人

古先哲王之用賢必防小人必任君子而秦檜總
權固上辱國始賢安可以國公加之乎噫高宗以
和議甫成肆赦加爵殊不知所失亦已多矣安有
明哲之君忍恥臣仇甘於自欺而尚可以論人道

哉直書於冊
深譏之也

遣使如金

沈昭遠賀生辰楊愿賀正旦賀禮俱用金茶器千兩
銀酒器萬兩錦綺千匹金匱契丹例不欲兩接使人
故併遣使
歲如之

冬十月攢徽宗皇帝顯肅皇后於永固陵以懿節皇后
附

尋改陵曰永
裕在會稽

以程克俊簽書樞密院事○進封秦檜為秦魏兩國公

辭不拜

以太后回鑒推恩也檜以封兩國與蔡京同故辭

發明

凡前代專權之臣綱目書其自為相國自加九錫復辭不受者所以見其矯偽欺世之罪

至於賊檜之事則書進封秦檜為秦魏兩國公而能辭不拜者何哉檜以封兩國與蔡京同所以辭之故綱目因而書以辭不拜耳然而檜不受而直書不拜則直暴怒峻却之而已此書法所以異於前代也嗚呼亂臣賊子至於專權無君極矣孰知於專權無君之中又有已甚焉者其視晉宋齊梁為愈下矣世變至此可歎也哉

十一月張俊免

初俊贊秦檜成和議約盡罷諸將獨以兵權歸俊及和議定諸將罷而俊無去意檜諷臺臣江邈論之遂罷為鎮洮崇信等軍節度使充醴泉觀使進封清河郡王奉朝請

劉光世卒

光世在諸將中最先進律身不嚴馭軍無法不肯為國任事嘗入對言願竭力以報國他日史官書臣功第一帝曰卿不可徒為空言當見之行事建炎初結內侍康履以自固又早解兵柄與時浮沉不為秦檜所忌故能竊榮以終其身方之韓岳不逮遠矣

徽猷閣待制致仕尹焞卒

焞質直宏毅實體力行程順嘗以魯許之且曰我死而不失其正者尹氏子也

發明

綱目於劉光世尹焞之卒一削其官一具其官則二人之賢否書法之予奪可見矣君子

宜細觀之

詔秘書少監秦熈修日歷

秦檜無子取妻兄王煥孽子熈養之南省擢為第一
檜以為嫡進士陳誠之策專主和議乃以為首熈次
之歷官秘書少監檜自知不為士論所與乃以熈領
國史自檜再相凡詔書章疏稍及檜者率更易焚棄
因以太后北還為己功自領其事
使著作郎王楊英周執羔上之

廣義

分注云秦檜自知不為士論所與乃以其子領國史而掩其惡檜能掩於當時其能掩於

後世也秦熈掩之而他史則不為之掩也綱目據其實而書之者甚檜之惡也

孟忠厚罷

忠厚始以外戚貴顯然能避權勢不以私干朝廷秦
檜忠厚之僚壻也未嘗親附世以此重之至是山陵
畢檜諷臺諫引故事
外戚不豫政罷之

十二月陝西大旱

初陝西連歲不雨至是涇渭瀕
漘皆竭民無以食多餓死者

發明 軍旅之後必有凶年此春秋伐莒之後繼以
大旱也此書大旱者賊檜專權妨賢病國而
內外怨咨之氣感動天變而旱乾作矣其以大旱
書者傳曰或不雩或雖雩而不雨也不雩則無憂
國恤民之心雩而不
雨格天之精意闕矣

西遼耶律達實妻蕭氏死子伊噶立

伊噶改元紹興籍民十八歲
以上者得八萬四千五百

癸亥十三年金皇統
春正月作太學

以岳飛
宅為之

二月作景靈宮

遣官自溫州奉迎祖宗神御至遂詣天章閣西
殿告遷徽宗及顯恭顯肅二后神御併奉安焉

廣義臣謹按春秋父兄之讐不共戴天況在汴諸
陵俱罹罹發掘之禍乃高宗以怯懦自居而甘

心臣金其得罪於宗祧也多矣今而作宮虛奉
不過脩飾外貌而欲偷安於一隅耳何足道哉

三月築太社太稷壇及園丘

發明

於戲宋人亡讐釋怨粉飾太平之心益著矣剛明之君必曰一城未復祖宗之恥未雪也一

地未歸祖宗之恥未雪也一族未返祖宗之恥未雪也名分未正祖宗之恥未雪也高宗失中原而不能復棄宗族而不能返貶稱臣而不能正則是祖宗之恥未雪一二誠五內分裂無望生全之時也而乃作太學作景靈築太稷立園丘紛紛制作繼書於冊自以江南為苟安之計而讐恥中原付之不問豈不可恥之甚乎蓋天子天下之父既亡其恥則一匹夫之不若耳詳書於冊蓋識之也

○夏閏四月立貴妃吳氏為皇后

后開封人年十四選入王邸帝既即位后常以戎服侍左右習書史善翰墨寵遇日隆累進貴妃帝憐邢

氏在金虛中宮以待其還至是秦檜累表請立后皇太后亦以為言帝從之

王次翁罷

時秦檜當國凡居政府者莫不以微忤斥始終不貳於檜者惟次翁一人而已

五月停給僧牒

先是臨安府乞度牒脩觀音殿帝不與特給錢五千緡曰朕觀人主欲消除釋老或毀其徒皆不適中往往而熾今不放僧牒可以漸消而吾道盛矣至是命停給雖特旨亦令執奏

六月程克俊罷○秋七月行人洪皓張邵朱弁還自金

自建炎以來奉使如金被拘囚者三十餘人多已物故惟三人以和議成許歸已而金人遣七騎追之及

淮而皓等已在舟中矣皓居冷山距會寧二百里地
苦寒穴居百餘家陳王古紳聚落也古紳敬皓使教
其子或二年不給衣食盛夏衣麤布嘗大雪薪盡以
馬天然火煨麵食之或獻取蜀策古紳持以問皓皓
力折之古紳銳意南侵曰孰謂海大我力可乾但不
能使天地相拍耳皓復辯之古紳怒曰汝作和事官
而口硬如是謂不能殺汝邪皓曰自分當死顧大國
無受殺行人之名願投之於水以墜淵為辭可也古
紳義之而止皓屢因謀者密奏敵情且力言和議非
計乞興師進擊嘗求韋太后書遣李徽持歸帝大喜
曰朕不知太后寧否幾二十年雖遣使百輩不如此
一書每遇貴族名家子流落於金者盡力拯救之留
金十五年而還入對內殿求郡養母帝曰卿忠賢日
月志不忘君雖蘓武不能過豈可捨朕去耶皓退見
秦檜語連日不止曰張和公金人所憚乃不得用錢
塘暫居為景靈宮太廟皆極土木之華豈非示無中

原意乎檜不擇遂除徽猷閣直學士提舉萬壽觀事
復以論事忤檜出知饒州邵被囚柞山踰年送劉豫
使用之邵見豫長揖而已又呼豫為殿院責以君臣
大義詞氣俱厲豫怒械於獄久之復送於金拘之燕
山僧寺從者皆莫知所之邵又以書言於金曰劉豫
挾大門之勢日夜南侵不勝則首鼠兩端勝則如養
鷹飽則颺去終非大國之利金人徙之會寧及還入
見除秘書脩撰主管佑神觀司諫詹大方論其使事
無成改台州崇道觀并副王倫使金既就館守之以
兵久之金將議和當遣一人受書還欲并與倫探策
決去留并曰吾來固自分必死豈應今日觀幸先歸
願正使受書歸報天子成兩國之好早申四海之養
於兩宮則吾雖暴骨外國猶生之年也倫將歸并謂
曰古之使者有節以為信今無節有印印亦信也願
留之使并得抱以死死不腐矣倫解以授并并受而
懷之卧起與俱金人迫并事劉豫且誅之曰此南歸

之漸弁曰豫國賊吾嘗恨不食其肉又忍北面臣之
吾有死耳金怒絕其餼遺以困之弁固拒驛門忍餓
待盡誓不為屈金人感動致禮如初久之復欲易其
官弁曰吾官受之本朝有死而已誓不易以辱吾君
也又以書決洪皓曰殺行人非細事吾曹遭之命也
要當舍生以取義耳乃具酒召被掠士夫飲半酣語
之曰已得近郊某寺地一旦畢命報國諸公幸痊我
其處題其上曰有宋通問副使朱公之墓於我幸矣
衆皆泣下莫能仰視弁談笑自若曰此臣子之常諸
君何悲也及薩里罕死弁密疏金國虛實曰此不可
失之時也遣李發問行歸報王倫還以弁奉送徽宗
大行之文為獻其辭有曰嘆馬角之未生魂消雪窖
攀龍髯而莫逮淚灑冰天帝讀之感泣官其親屬五
人謂丞相張浚曰弁歸日當以禁林處之及還入見
便殿弁謝且曰陛下與金人講和上返梓宮次迎太
母此皆知時知幾之明然時運而往或難固執機動

有變宜鑑未兆盟可守而說詐之心宜默以待之兵
可息而消彌之術宜詳而講之金人以黷武為至德
以苟安為太平虐民而不恤民廣地而不廣德此皆
天助中興之勢若時與幾陛下既知於始願圖厥終
帝曰善秦檜惡其言奏以初
補官易宣教郎直秘閣而卒

發明

直書行人洪皓張邵朱弁還自金嘉不辱也
高宗建炎初書遣洪皓等使金至是凡十五年

矢書還自金則其全節可知然無褒美之詞何哉
蓋亦臣子當為之事故爾此又綱目之深意也如
漢書蘇武還
自匈奴同意

廣義

洪皓朱弁可為不辱君命
者矣味諸分注義自見矣

帝書六經刻石於太學○冬十二月朔日食

是日陰雲不見秦
檜率百官稱賀

金人來聘

賀正旦也禮物金酒器六事色綾羅
紗縠三百段馬六匹自是歲如之

癸明

女真自政和五年始改號金宣和七年入寇
靖康元年入寇建炎三年入寇皆以號舉者惡

其恃強不恭故貶之也至是來聘遂稱人者喜其
慕義自通故進之也此固綱目取法春秋之深意
耳

復置三館

上謂宰執曰人才須素養太宗置三館養天下之士
至仁廟人才輩出為用今日若不興學校將來安得

人寸
用耶

丁卯十四年

金皇統四年

春正月樂平水鬪

樂平縣何衝里田龍數十百頃田中水類為物所吸聚為一直行高平地數尺不假隄防而水自行里南程氏家井水溢亦高數尺天橋如長虹聲如雷穿牆毀樓二水鬪於杉墩且前且却約十餘刻乃解各復故

發明

水者陰類樂平水鬪異之異者自有書契以來災異雖多然未聞水鬪者此綱目之所特

書也書曰嗚呼天難諶命靡常常厥德保厥位厥德靡常九有以亡高宗信任非人忘讐事敵則其

逆氣所激固有致夫災異者而宋之君臣方且溺於宴安恬無警省天變豈有虛生之理哉弗克畏

天災咎之
來必矣

二月万俟卨罷以樓炤簽書樞密院事

初卨自金還秦檜假金人譽已數言屬最聞卨難之他日奏事退檜坐殿廡中批上旨輒除所厚者官吏鈴紙尾進卨曰不聞聖語却不視檜大怒自是不交一語諷言官李文會詹大方論之卨遂求去

三月帝謁孔子廟遂視學

國學大成殿成司業高閌表請帝視學從之止輦於殿之外步趨升降退御鼓化堂命禮部侍郎秦熈執經高閌講易泰卦胡宏見其表移書責之曰太學明人倫之所在也太上皇帝叔制於彊敵生往死歸此臣子痛心切骨卧薪嘗膽宜思所以必報之大讐也太母天下之母其縱釋乃在金人此中華之大辱臣子所不忍言也而柄臣乃敢欺天罔上以大讐大辱而為大恩閣下目覩忘讐滅理北面敵國以苟宴安

之事猶假然為天下師儒之首既不能建大論明天人之理以正君心乃阿諛柄臣希合風旨求舉太平之典又從而為之詞欺罔孰甚焉安國子也

發明尊師重傳崇學尚文固帝王之美事然又不可以概論也高宗忘戴天之讐習偷安之事謁聖視學掩飾虛文宜乎有以來胡宏之譏也春秋所貴者復讐之義綱目所貴者亦復讐之義忘親釋怨又豈春秋綱目之所貴哉故書帝謁孔子遂視學文無貶詞乃所以深貶之耳美惡不嫌同詞

廣義

高宗請帝視學似矣然高宗之時乃屯否塞剝之時也豈泰道之世乎胡宏責之何其當哉

夏四月初禁野史

從秦檜請也後著作郎林機言有失意之人匿迹近地窺伺朝廷作為私史以售其邪說請禁絕之復下詔中禁之

發明

大抵史者公天下後世之是非者也豈一人之私而能滅衆人之公論哉賊檜掩護其惡

之不暇亦愚矣嗚呼使果能禁則自呂秦以至於今人皆不知聖賢之訓是非顛倒黑白不分久矣善乎呂東萊曰史官萬世是非之權衡禹不能廢鯀管蔡不能貶周公趙盾不能改董狐之書崔氏不能奪南史之簡公是公非舉天下莫之能移焉昔司馬遷作史記武帝惡其直筆刊落其書然公議之在天下抑則揚塞則決窮則通縱能削一史官之事安能扼天下之筆乎書曰禁野史者譏檜之愚也

五月樓炤罷以李文會簽書樞密院事

文會劾炤罷之遂命文會代炤
自是執政免即以言者代之

閩浙大水

內侍右武大夫白錡從皇太后北歸者因閩浙大水
宣言燮理乖盪洪皓名聞華夷顧不用錡館客張伯
麟嘗題太學壁云夫差而忘越人之殺爾父乎秦檜
怒之俱坐誹謗刺配錡於萬安軍伯麟於吉陽軍罷
皓提舉江
州太平觀

發明

是時宋之君臣偷安忍恥其行逆德而陰沴
之應必矣蓋燮理陰陽宰相之職陰陽不和

同宰相之責也秦檜位首相燮理乖方侮慢自賢
大逆不道而乖氣磅礴則有以致夫異氣大水之

應不在茲乎而賊檣方且惡白鈔張伯麟之諷諫
刺配遠方吁災異之來不知戒懼而又罪直言之
士則其忽慢天變
豈不從可知哉

秋八月金主亶殺其子魏王道濟

發明

陳人殺其公子禦寇君子以為公子之重視
大夫殺而或稱君或稱國或稱人何也稱君

者獨出於其君之意而大夫國人不與也如晉殺
世子申生之數是也蓋父子之恩出於天性金主
無故而擅殺其子則其於父子之道亦大悖矣殺
殺無罪也仁者以其所愛及其所不愛不仁者以
其所不愛及其所愛
書主斥名惡自見耳

○九月徙趙鼎於吉陽軍

秦檜怨鼎不附和議凡鼎所善者如張九成折彥質張戒解潛辛承宗皆指為鼎黨敗斥之鼎在朝五年杜門謝客時事不掛口有問者引咎而已先是鼎請正建國公皇子之號檜言鼎欲立皇太子是待陛下終無子也宜俟親子乃立至是中丞詹大方希檜意劾鼎與其黨范冲邪謀密計轉相扇惑以徼無妄之福蓋指皇子而冲嘗為細善故也遂移鼎吉陽鼎謝表有曰白首何歸悵餘生之無幾丹心未泯誓九死以不移檜見曰此老倔强猶昔

冬十月何若請黜程頤之學

右正言何若指程頤張載遺書為專門曲學請戒內外師儒之官力加禁絕秦檜從之

十二月李文會免以楊愿簽書樞密院事

愿為中丞迎合檜意以舉新人號之
為肉簡牘至是論文會遂代其位

王倫為金所殺

金欲以倫為平州路轉運使倫曰奉命而來非降也
金賜以威遣使來趣倫拒益力金杖其使俾縊殺之

發明

王倫往返金國贊成和議不為無罪故其見
殺而不書金殺王倫而書王倫為金所殺所

以明其有可殺之道故金得而殺之焉耳雖然王
倫固有贊成和議之愆然亦上之所命非倫之自
行也則是受命天朝奉將使指其權初不在已故
綱目書此正以著秦檜陷害之意若曰朝有使臣
如王倫者不能保全始終乃使之為金所殺故夫
金人非能殺王倫乃是朝廷使王倫為金人所殺
耳書法如此其所以歸罪當時之意為何
如哉如唐書顏真卿為李希烈所殺同義

乙丑十五年

金皇統五年

春正月朔初御大慶殿受朝

發明

嗚呼高宗誠無足與論復讐之事矣胡氏曰父母之讐不共戴天兄弟之讐不與同國朋

友之讐不同市朝今高宗與金人不共戴天無時焉而可忘也顧乃御殿受朝晏然自肆則自忘親釋怨非人子矣獨不計父母客死窮荒中原僅存半壁抑且稱臣奉貢撤備罷兵高宗非無人心者何故溺於自棄甘於受辱而行之此姑息之事哉直書曰初深貶之也

○夏四月朔慧出東方大赦

發明

書曰夏王弗克庸德慢神虐民皇天弗保監於萬方啓迪有命眷求一德俾作神主惟尹

躬暨湯咸有一德克享天心受天明命以有九有之師爰革夏正然傑之所以失天命湯之所以得

天命者以此是時豈出東方其異滋甚高宗未聞
有省已責躬之實而徒肆赦播於境內抑足以為
彌變之道乎弗克庸德慢神虐民天命
安得而不失哉據事直書其義自見

○六月朔日食○帝幸秦檜第

上賜檜第又賜銀萬兩絹萬匹錢萬緡緣千匹車駕
親幸加檜妻兩國夫人子煇學士承旨婦羣夫人孫
墳堪坦並除直秘閣賜三品服墳時方九歲尋書一
德格天之閣六字賜檜後又命作檜家廟賜以祭器
發明 幸檜第何以書譏之也屈萬乘之尊幸佞臣
之第則其失尊卑之道明矣况秦檜姦邪尤
不足幸者乎則是高宗知有秦檜而
不知有宗社也豈不深可愧也乎

廣義

此即徽宗幸蔡京王徽之第耳觀分注之備
載則知高宗之貸賊檜其真宗王旦之流弊


歟然曰一德格天者臣見成湯伊尹不如是之狂妄也

秋七月放張浚於連州

浚因星變欲力論時事以其母計氏年高言之必被禍計氏知之誦其父咸紹聖初策曰臣寧言而死於斧鉞不忍不言而負陛下浚意遂決即上疏言當今事勢如養大疽於頭目心腹之間不決不止達則禍大而難決疾則禍輕而易治惟陛下下謀之於心斷之以獨謹察情偽豫備倉卒庶幾社稷安全不然後將噬臍事下三省秦檜大怒令中丞何若劾之遂貶連州居住尋徙永州檜必欲殺浚以其死黨張柄知潭州與即丞汪召錫共伺察之

冬十月楊愿罷以李若谷簽書樞密院事

愆希秦檜意附下罔上
至是斥去天下快之



御批續資治通鑑綱目卷十四